

條例備考


兵部 卷之二

漢書門類		九二四六號	一〇五函	二架	二四冊
------	--	-------	------	----	-----

內閣文庫		
漢書類	九二四六號	二四冊
漢書類	九二四六號	二四冊

內閣文庫	
番號	漢 9246
冊數	24 (13)
函號	296 80

共二十四



條例備考卷之二目錄

兵部

審編民兵

公給散以清驛傳

專差委以苛奸弊

襲替舍人文藝兼治

武職古軍糧餉用交床

慎將領以靖邊防

百級兵以重聲勢

練外兵以為羽翼

防制達官以需調用

區處屯丁以防虜患

經畧邊關以防黠虜

鞭策武以冀自效

專責委以杜聚寇

專內治以杜釁端

慎用人

明賞罰



清勾遊二軍士以充行伍十七 速陞賞以勸有功十八

復太倉兵備十九 軍職永遠充軍子孫二十

軍職立功并應襲入學二十一 武職充軍遇革閑住二十二

責安南朝貢二十三 郡王民校徵銀雇役二十四

糾論濫薦將官二十五

南京馬快船料付部南糧官順解二十六

指揮毆打監兌主事教養幼軍夷人二十七

大臣巡邊御史閱視邊糧二十八 禁止濫給關文二十九

處備護送 梓宮官員合用船馬條款三十

添設興都留守司及顯陵衛三十一 公薦將材三十二

承天守備體統照鳳陽例三十三

奉 旨暫罷武舉鄉試三十四 雇借騎操官馬三十五

洪武年間功陞軍職後犯典刑子孫准襲三十六

撫處安南附後

撫處安南叛蠻三十七 安南投降小目解京三十八

安南事竣獻圖三十九 議處安南事寧陞賞四十

條例備考卷之二

兵部

審編民兵

一嘉靖二十三年閏二月內兵部題該巡按直隸
監察御史虞守愚題為申議民兵以裨軍伍以
固保障事該本部看得各處民兵自弘治正德
等年以來節該題奉

欽依遵行操演有時私役有禁優恤有例遴選有方
合行各處巡按御史備行布政司并守巡兵備
等衙門嚴督府州縣趁今大造之後將各民兵

計審丁糧除官吏生員匠竈軍戶量加優免若戶不滿二丁田不足五畝審果貧難者免編外其餘照依原額僉編務使遴選強壯諳曉武藝之人充當工食器具悉照丁田派徵資給務農講武各以其時撫按守巡并府州縣官員尤宜嚴加較閱使各知所懲勸造冊送部查考

公給散以清驛傳二

一嘉靖十三年八月內兵部題該巡按直隸御史鄧直卿題為陳愚見以杜夙弊以裨鹽法以綏地方事本部覆奉

欽依沿河一帶并各處驛遞俱有馬頭驢頭協濟夫役併修船銀兩解府收庫每遇驛遞領銀之時每十兩多則扣銀二兩少則亦不下五錢以充本府公用名為常例加以吏胥索求十不能存六七矣由是官吏做做任意花銷今後府州給散驛遞銀兩按月令知縣一員當堂拆封秤驗令驛遞官親筆填寫領狀年月處用使關防及於數目緊要處則鈐蓋縣印以防吏胥更換該府仍給以印信循環文簿令其按月填報聽候巡按不時吊查敢有仍行尅減上下雷同巡按

御史指實叅奏

專差委以革奸弊 三

一嘉靖十三年八月內兵部題該巡按直隸御史鄧直卿題為陳愚見祛夙弊以禪鹽法以綏地方事本部覆奉

欽依自通州至濟寧一帶併山東地方巡捕巡鹽人員多是義民陰陽營求差委作弊殃民府州縣佐貳官則飽食終日而於封疆之責漫不究心寇盜生發則諉曰巡捕之責也鹽犯橫行則諉曰巡鹽之責也夫義民陰陽官俱是土著與強

竊之徒私犯之軍互相交賄無所顧惜每遇上司按臨則寧受一時責辱過後又復然矣今後巡捕巡鹽務要會委府州縣佐貳官一員管理如佐貳官員缺方許委首領有官之日仍舊定委佐貳如有仍前濫委陰陽義民及通同吏胥營求作弊縱賊殃民者一體提問依律懲治

襲替舍人文藝兼治 四

一嘉靖十三年八月內兵部題該給事中朱隆禧題為殫愚識覈比試以重本兵事本部覆奉

欽依比試人員弓馬不閑據鞍軟怯自嘉靖十四年

春選為始較藝之日容授九矢定限步數騎射
三矢以上步射一矢以上中的者准為合試仍
令課誦五經七書臨試默寫一二篇俾知武畧
在內行五軍都督府轉行各該衛所在外行巡
按御史轉行各都司衛所自文書到日於凡襲
替官舍人等務令精習騎射及誦習經書者方
行起送赴部聽選北試

武職占軍擡轎用交床

五

一嘉靖十三年八月內兵部題該給事中潘大賓
題為遵 明旨陳愚見以裨脩省事本部覆奉

欽依凡兩京內外大小軍職各役占軍伴賣放軍人
包納月錢出入擡轎擅用交床上馬者在內聽
巡視京營科道官在外聽撫按官查照問刑條
例指實叅究

慎將領以靖邊防六

一嘉靖十三年八月內兵部題該山西道御史劉
希龍題為欽奉

明旨陳言脩省事本部覆奉

欽依通行各處撫按官將地方指揮以上將官不拘
是否見任從公博訪果有謀勇才望堪濟一面

行邊腹地方總副叅遊都司守備官員作速奏
保

預畿兵以重聲勢七

一嘉靖十三年十月內兵部題該本部右侍郎徐
一題為脩舉武備以防不虞事題稱招民為軍
類非土著居人既無父兄產業以藉稽考未免
徒耗衣裝冒叨糧賞乞要於原編火夫內有年
壯膂力過人并家有二丁以上者開報壯丁到
官再加精選紀其年貌貫址以備鄉兵之藉如
上司初至之日召令面試藝勇量為犒勞即放

歸農生業秋冬務閒兵備官周歷閱實而再試
之試其勇藝而教其不能若有緩急必待兵部
題本方纔起調等因覆議得順天府霸州文安
等處人生強悍多諳弓馬平居無賴聚為寇攘
使在上者聯屬有方撫而教之不必遠事召募
而畿內近地數萬精兵倉卒可備誠防危制變
之一策也本官具奏前因相應酌處覆奉
欽依行令巡撫順天都御史督同兵備及分管府官
除各州縣額設民兵照舊審編操練外查原編
火甲內有年力精壯諳習弓馬及戶內丁多差

少可藉鄉兵者查照侍郎徐 所奏俯循土俗
人情從宜善處籍名在官量免雜泛差役專備
有警具奏調用一應編選聯屬訓練閱試賞罰
及處給胄鎧器械事宜悉聽巡撫衙門量酌舉
行仍嚴禁各該有司及管領人員務要善加撫
諭不許張皇震驚生事科罰及指以點視為名
拘留差占擾害地方違者聽撫按官從重叅究
治罪

練外兵以為羽翼八

一嘉靖十三年十月內兵部題該本部右侍郎徐

題稱山東德州武定山西寧山陝西潼關等
衛設為直隸蓋欲犬牙相制以防禦外侮拱衛
京師而京師擁列諸衛居重以馭輕疆餘以弱末
立法之初未為不善承平日久人心玩狎京軍
以多役少練而坐致罷弱直隸以形分勢遠而
久不簡稽重以世胄非時誅求迫急名藉雖存
而逃流過半矣正德初年邊事告急議以叅政
韓福為大理少卿操演畿輔民兵又分撫按官
閱實直隸府州衛所當如往年故事推舉內外
文職官內有文武長才諳曉韜畧實心廉慎可

以爲 國家養君民者加以僉都少卿之任提
督直隸軍民兵及行撫按并鄰近山東河南山
西陝西湖廣撫按各督同該道守巡兵備等官
各着實清查挑選軍丁內精壯驍勇之丁爲一
班次壯勇者爲二班老幼孱弱者爲三班逃故
者行移各該撫按官協心勾補務足原數民兵
則盡數精選壯勇弱者革退另補復召募教師
分投教演操練武藝使之精熟過人以一當十
其有成效者悉聽便宜區處所在無碍錢糧供
給衣裝什物犒勞厚其餼廩其鄰近軍衛有司

所管軍餘閒民武勇過人有父兄戶籍者亦聽
從宜精選召募別爲營房一體安插教演挑選
守法知兵善能撫馭軍衛有司官員分投率領
遇有緩急征調行移撫督官計程定日分投齊
牌調用可以一呼而集等因該本部覆議得畿
內武備已自單弱而附近山東河南山西陝西
湖廣等處衛所軍民兵又皆罷耗不振設有倉
卒不逞之變內外無備誠可憂慮本官憂深慮
遠具奏前因相應議處覆奉

欽依通行北直隸山東河南山西陝西湖廣各處巡

撫都御史督同兵備守巡及府州縣衛所官員
將所在民兵照依本部前議事理作急編選如
法團操以時較閱旌別賞罰使皆強壯精銳可
備征調仍須加意撫恤不許私自占役生事科
擾違者聽撫按官從重叅究治罪仍候編選已
定造冊送部查考其各衛所操備軍丁悉照侍
郎徐 所奏逐一挑選精壯驍勇者為一班次
壯勇者為二班老幼孱弱者為三班二班者擇
委各該都司衛所廉幹官員統領輪操召募教
師練習武藝三班不堪操練者革退另選強壯

軍丁替役逃故者移文各該撫按清軍官嚴限
勾解補伍仍將選過姓名定過班次教習過武
藝申各該巡撫都御史逐一比較查考一應合
用糧餉器械犒賞工食分撥防守并召募鄰近
軍餘閒民別為營房安插教練事宜俱聽巡撫
衙門隨宜酌處既不得因循怠玩徒應故事亦
不得舉措失宜重貽紛擾

防制達官以需調用 九

嘉靖十三年十月內兵部題該本部右侍郎徐
題稱直隸保定等衛分俱有防制達官舍目

其驍勇強悍壯毅氣習與漢人不同所為非我
族類未敢保其不異但以安插既久勢難輕議
惟在所司宣布

朝廷赤心以置其腹依時賞給以安其家固立綱
紀嚴飭武備以制其反側之念合無咨行巡撫
督令兵備及該管達官軍衛有司一體鈐束於
霜降開操之日問一試觀武藝而犒勞之常操
不必拘演常調不必遣行惟弗得已而後用其
長技如晁錯所謂兩軍相為表裏之術也又須
加意推誠恤其所私使知有中國生涯之樂妻

子室廬之繫必得其心而盡其力庶可無他累
也本部覆查得先為陳言畿輔地方事宜以裨
聖政事該巡按御史孫錦題稱保河二處達官舍餘
生息日繁雖服

王化而夷性向存要將各府安插達官舍餘壯健
者分屬於指揮千百戶而節制於總兵守備與
各軍衛一同操練鄰住軍民聽其婚嫁換弓馳
馬及方命歇役暴橫鄉鄰讐怨親族者務加禁
約仍立鄉社擇師教之使通文義有志舉業者
收之學校官員可寄以政事者亦列之軍政則

黠傲之性潛消於陶鎔之餘忠義之心奮發於誘掖之下非惟不能爲害而反爲吾用等因已
經覆議通行欽遵去後今本官具奏前因查與
節行事理大畧相同覆奉

欽依通行保定等處撫按官查照本部節次題行撫
馭達官舍日事宜并令侍郎徐 所奏隨宜酌
處次第舉行務使夷情馴服長技可用則操縱
調遣惟我所制永無意外之變

區處屯丁以防虜患

一嘉靖十三年十月內兵部題該本部右侍郎徐

題稱大同等處近郊多爲戎馬蹂踐遺棄屯
田并荒閒地土業多膏腴可獲子粒之利其四
衛餘丁就地耕種或立浮莊狎習虜寇小則率
衆抗敵大則走藏軍堡率以爲常合無行令撫
按衙門督行該道兵守等官再行查勘種地之
人若干籍記其姓名仍於堡內官爲動支銀兩
起蓋房屋居住不許搬移令其無事則率衆耕
收虜至則登陴拒戰有功者量加犒賞該道官時
往巡行督察仍選委老成知事守法千戶一員
日支行糧責令率領及編總小甲立牌日輪一

人哨探虜賊消息候其將來卽令舉號鳴鑼使
知警備入則俱入守則俱守不許參差延緩致
虞官軍等因本部覆議得宣大陝西各邊近郊
蹂踐荒棄屯田地土間有舍餘軍丁及本處閒
民就地耕種立堡居住者使非堡壁完固器械
素備倉卒虜至無所捍禦勢必震驚逃避不及
輒遭殺擄何以能守今本官具奏前因相應議
處覆奉

依備行各邊巡撫衙門督令該道兵守等官逐一
查勘種地丁民若干立有堡壁若干除力強足
恃城堡完備者聽其自爲防守內有堡壁稱
貧弱不支或鄰近丁少併居者卽行各該軍
有司官員動支官銀設法修整量給器具足備
戰守其委官率領編立牌頭輪流出哨舉號策
應等項事宜俱聽巡撫官俯循各邊人情土俗
隨宜酌量務使各堡丁民聲勢聯屬與官軍相
爲犄角可以禦虜虜雖突入亦不能爲患矣

經畧邊關以防黠虜 十一

一嘉靖十三年十月內兵部題該本部右侍郎徐
題稱居庸紫荆等關皆鄰邊阨塞之地中間

邊牆缺口去處各該撫按巡關及兵備等官必
能盡職整飭固守但恐地方廣闊或限於巡歷
之未周文移雖頻或怠於奉行之玩愒又聞各
衛守邊官軍關於利害乘無點關私自替回幹
家酣宴乞要降

勅一道與三邊撫按巡關官督令兵備等官各躬加
閱視邊關城牆缺口去處如有倒塌低薄卽加
增繕修補務須堅實仍不時躬親點視若有逃
回等項拏究如仍前怠緩致令虜賊乘虛突入
以貽邊患者撫按照例參究等因本部覆議得

先爲叛軍勾引大舉達賊深入城下衝圍官軍
爲患事已經議推總兵官張輓前去居庸密雲
等處總兵官江桓前去紫荆倒馬等處將各關
隘逐一查勘整飭添撥官軍民兵及添設參將
祝雄分守白洋口地方一體防守去後今本官
具奏前因查與節行事理相同但前項邊關地
方廣闊城牆隘口空缺數多雖經修理時有損
壞及各該守邊官軍率多偷閑曠役不行用心
防守恐致踈虞覆奉

欽依備行各邊巡撫都御史并巡關御史督令兵備

分守等官時常巡歷各邊關隘城墻缺口逐一閱視遇有倒塌低薄去處隨時督軍增繕修補務令堅固險塞可以禦虜仍將各該守邊官軍不時點閱若有私自逃回及賣放曠役者卽行拏問重治干碍職官照例叅究

鞭策武以真自效 十二

一嘉靖十三年十月內兵部題該本部右侍郎徐題稱見行事例軍職有犯監守比常人盜律該斬絞罪俱發邊方立功五年滿日還職帶俸差操此律似爲腹裏衛分而設若兩鎮三邊諸

處臣以爲犯該立功克軍者巡撫衙門查訪得實不必定發別處就令軍門酌量聲息隨宜調遣殺賊令其懲創奮發立功如果有功卽與議奏遞爲末減以贖前愆或有非常勲績一體拔用若屢試不效者仍與重治本部覆查得先准戶部咨條陳內一件處立功以勵武職事已經議行各邊鎮巡等官凡遇立功官員到日定撥處所或撥副叅遊擊等官營中或撥關城把總等官名下收管明白操備隨征中間果有奮勇殺賊擒斬俘級不係買奪詐冒者准令報驗紀功

覈實造冊繳部候立功限滿還職之日一體查
議陞賞通行欽遵去後今本官具奏前因無非
策勵武臣圖報防邊之意但改定邊方立功克
軍事例係干刑名覆奉

欽依移咨都察院再加詳議奏

請施行

專責委以杜聚寇 十三

一嘉靖十三年十月內兵部題該本部右侍郎徐
題稱邇來兵防等官類多未能舉職以致民
患莫除盜賊滋蔓乞要申飭各處撫按督令各

該兵備江防海道官各移家於原設緊要地方
衙門駐劄廉政以率屬咨訪以盡情簡閱以實
兵操練以振武聯屬保甲俾其相稽適設鑼鼓
使之相聞互為犄角使之相救堅其險阨俾之
相守其平時已能振舉武備者務須益勤乃職
以固藩籬以需超擢其有仍蹈前轍遷延誤事
釀成地方大患者責令撫按叅究從重處治本
部覆查得先該巡視都御史許廷光題為備邊
事已經議行兵備海道及備倭守備都指揮等
官各照今擬地方隨帶家小常川駐劄不時往

來該管地方巡歷不許擅離赴省如違聽巡按御史糾奏處治通行欽遵去後今本官具奏前因相應申明戒飭覆奉

欽依通行南北直隸及各省撫按官督令各鎮地方兵備江防海道備倭守備官員務要遵照先今題行事例到任之後即便隨帶家小於原擬地方衙門駐劄仍時常巡歷該管地方一應正已率下足兵振武彌盜安民緊要政務悉照侍郎徐所奏着實舉行若有延住省城不修武備縱賊滋蔓遺害地方者聽撫按官指實參奏從

重處治

專內治以杜弊端 十四

一嘉靖十三年十月內兵部題該本部右侍郎徐

題稱兩廣雲貴向為蠻夷之地雖設土官統轄而犬羊狼虎吞噬無常終不能使之馴化也

乞要申

勅各邊巡撫都御史巡按御史嚴戒各該兵叅等官務要布其威信嚴其阨塞謹其哨堡軍民村寨各令深溝高壘兼預金鼓器械遠近相聞圍結應援以防其侵軼發打手官軍不時出哨巡邏

蔽伏擒捕以遏其寇盜督察土官多方構害需
求而使之得所查究江西等處游食經商藝術
之徒出入夷寨導誘而措之生姦果其自作不
靖雙殺地方務要剿撫得宜使深居醜類以無
事相安兵革不煩大興而帑藏免於浪耗其果
阻塞官道攻劫倉庫城池殺虜人衆方議大征
若有無故虛張事跡肆開兵端以起邊釁致令
損師費財以貽地方之患者聽撫按指實叅劾
從重處治本部覆議得兩廣雲貴地方山箐險
阻蠻夷盤據其間各夷族類爭忿互相吞噬率

以爲常各守邊將吏不能專立自治宣威示
制馭且而撫馴之遇有小警貪功妄動輒議征
剿渠魁惡黨憑恃山險窟伏走戲徃徃橫殺無
辜坐困官軍召釁買禍不可勝道本官具奏前
因相應依擬覆奉

欽依備行各邊撫按官嚴戒各該兵叅等官查照本
官所奏一應自治邊方事宜俱要着實舉行如
各夷自作不靖雙殺地方尤須審察善處兩廣
則行鵬剿之法雲貴則行挾撫之法但使各夷
帖服息爭安業則已果係結黨構亂攻劫城池

大音考
獄庫殺虜人衆方許請兵征剿若有貪功僨事
之人虛張聲息擾開兵釁貽害地方者聽撫按
指實從重叅究

慎用人 十五

一嘉靖十四年五月內兵部題該給事中邢如默
題爲預處邊鎮以除積弊以圖治安事題稱我
皇上御極興衰振圯禮備樂和簡將以訓內兵示惠
以恤諸鎮者罔不至矣而驕兵悍卒仍復不悛
大同之變甫息而遼陽之釁幾成往者固由別
總兵時陳都御史呂經行事乖方所招而今

撫鎮諸臣未知其人得無如時陳呂經者乎有
則早爲易置慎選處事鎮靜恩信素爲衆所感
服者以爲統御毋使如二臣之僨事招亂而起
釁也本部覆議得

朝廷之休戚係邊鎮之安危邊鎮之安危係將官
之賢否蓋得其人則一方安集不得其人則千
里騷擾從古迄今無不然者近年以來潢池拒
命邊陲效尤以士卒而戕鎮將以廝養而辱重臣
是故悍兵逆卒罔知憲法之所爲要之亦皆一
方鎮守等官不能揜拊或行事之多乖或用刑

之非法或會婪以肥已或刻薄以凌人民乃作
慝遂生厲階治禍之源當慎舉措覆奉

欽依移咨總制并各該都御史會同巡按御史秉公
持正速將各處總兵分守叅遊守備等官止據
實跡下察輿情於各員項下明白填註考語造
冊繳報以憑本部叅詳咨訪分別去留陞調奏
請定奪

明賞罰 十六

一嘉靖十四年五月內兵部題該給事中邢如默
題稱

朝廷奔走天下之豪傑在賞罰所以奔走豪傑而
使為之用者則在明賞罰也賞罰不明則人志
弛懈雖堯舜不能治天下而况其他乎今邊臣
之功罪例該查勘者不少也中間微有掣肘動
經數載有功者或死而子不得繼有罪者治遲
而巧肆彌縫且冒功匿罪之弊相緣踵出乞嚴
立限期凡有功罪以時勘報使賢者速於獲賞
而罪者亦無所逃則人思奮勇而冒濫之弊鮮
矣本部覆議賞罰者
朝廷之大柄賞罰不當固無以激勵人心而或出

納之吝則無以鼓舞士氣古之人賞不移時罰不遷刻良有以也邇來四方功罪查報之令紛無寧日是以賞罰之舉多弊今照各處各邊亦有獲功之後數十年未及一賞策首功者有沒齒於伍行建偉績者或積恨於泉臺人心憤惋士氣摧殘莫此為甚查得弘治年間節奉

孝宗皇帝聖旨說與兵部各邊官軍殺賊功次往因行查勘報稽遲多有泯沒不行陞賞人無激勸今後但有奏報功次卽行巡按御史查勘還定與限期薊州宣府大同山西遼東等處一兩箇月陝西

湖廣三四箇月甘肅四川貴州兩廣雲南六七箇月各要的實明白依期造冊繳報到部隨卽覆奏若有勘報遲延過違限期的你每會同都察院參究奏治欽此又該總督三邊都御史王 題爲查催功次早爲陞賞以勵人心事本部覆議行各處巡按御史將各年該勘功次公同原委守巡等官責限上緊勘報造冊奏繳以憑陞賞若有因循不理指名舉參提問罪黜巡按御史滿日都察院查照稽考俱經通行欽遵外今該前因覆奉

欽依移咨都察院轉行巡按御史會同各該原差官員先將陝西大同二處功罪作速查勘明白造冊奏繳至日本部仍照例陞賞其有罪人犯查照律例究問至於各邊各處一體遵依節年題准期限作速繳報以憑奏

請如仍前怠玩過違期限者本部會同都察院查照舊例施行

清勾逃亡軍士以充行伍 十七

一嘉靖十四年二月內兵部題該甘肅都御史牛題為議處邊備以禦虜患事本部議得河西

十五衛所原額旗軍共七萬一千五百二十七名見今止有二萬七千四百四十六名逃亡事故四萬四千八十一名每年雖有清勾之例緣河西衛所冊籍不真尚有通無冊籍者每遇造冊捏寫詭名籍貫雖經兵部發冊清勾名籍既不相對或以地方災傷停止所以逃軍通不解到軍伍愈缺戰守無人有妨屯政乞要移咨南京兵部許令河西十五衛所差官將各衛所成化年間軍冊抄謄一本委官磨對清切給發陝西行都司以憑清勾仍行各省清軍官盡將河

西軍士逐名清審逃亡者拘令本軍戶內壯丁帶領真正妻小每三五十名委官一員入逃押解該管各道倒文轉發着其在衛有人應伍者止解單丁查理每省仍差官二員催取其陝西八府逃軍尤多地方稍近每府各衛所總差官一員守催其解到逃軍各該衛所以十名爲一次具呈該道轉呈巡撫衙門務遵

祖宗舊規定撥三名守城七名屯種等因本部查得宣德十年本部題爲計處清軍事宜以便遵守事議將

國初各該衛所在伍有缺俱得徑差官旗勾補三嘉靖十一年二月內議行各衛所照依定與單式每軍一名填單一張查明印蓋送部掛號轉發各該司府州縣清審其丁盡戶絕并山後人民挨無名籍者候查勘五次以上原單送清軍御史審實類繳免其再勾若里甲鄰佑人等通同作弊將有丁捏作故絕事發應解軍丁照例發邊遠充軍原係邊遠者發烟障極邊仍令僉戶丁一丁補伍里甲鄰佑人等照例發附近充軍官吏依律問罪今本官題稱要行每省差官

二員其陝西八府每府各衛所總差官一員守
催逃故軍士但經已有題革事例難以准議其
稱河西十五衛所用籍不真尚有通無用籍者
清勾不對以致軍士逃亡數多戰守缺人有妨
屯政要行差官抄騰軍冊嚴限清解一節但邊
方比腹裏不同尤當便宜處置相應依擬覆奉
欽依備行南京兵部准令河西十五衛所差官將各
衛所成化年間軍冊抄騰委官磨對清切印封
給發陝西行都司轉發各該衛所清查宣德四
年以後至今逃故軍士查照本部議定清勾事

例填單差人送部掛號各該司府州縣轉發
各清軍官員審拘本軍戶內壯丁帶領妻小每
三五十名委官一員入透押解赴各該兵備分
巡等道倒文轉發各衛所着伍其在衛有人應
伍者止解單丁查理各衛所將解到逃軍以計
名為一次具呈該道轉呈巡撫衙門定撥三名
守城七名屯種每屯軍一名給田五十畝徵納
官糧六石成熟者查照舊規起科新開墾者照
例限以三年納租缺乏牛種官為查給各該掌
印管操管屯等官務要加意撫恤不許凌虐科

索逼迫逃竄違者聽撫按官參究

速陞賞以勸有功 十八

一嘉靖十四年七月內兵部題該巡按直隸御史

張勅題為條陳邊務以圖治安事本部覆奉

欽依今後凡遇各邊獲功務要即委該道官親詣戰

陣地方量其遠近定以限期秉公查勘果係真

正首級就彼紀驗明白依期轉送巡按衙門體

勘是實冊內查無訛舛造冊奏繳酌議陞賞

復太倉兵備 十九

一嘉靖十四年八月內兵部題該給事中朱隆禧

題為議沿革靖海洋以保重郡以圖久安事

稱太倉鎮海等處長江東注宗聯巨海水之尾

間盜之叢出近以董燦王棣二姓讐殺殃及土

民撫巡計伏首惡而餘孽滋蔓肆行方張審機

揆策事不可緩

祖宗額建太倉鎮海二衛以備倭奴截港之役特設

兵備憲司一員駐劄太倉以專控禦上下嚴督

兵民震懼即有小警不旋時而銷鎔矣自弘治

年間巡撫都御史朱 誤聽軍強民弱之議即

疏建州治而憲司寢革自茲法隳民病乞要查

照

祖宗舊制設立兵備副使一員領

勅額守嚴束官戍其添設州治原非舊額實係撫臣

紛更及要行令撫巡等官從長計處等因本部

查得先為立州治以安地方事該巡撫直隸都

御史朱 題稱太倉鎮海二衛軍民雜處詞訟

繁興宜建一州以便軍民等因該戶部議擬添

設一州統領崇明一縣仍將崑山嘉定常熟三

縣附近人民分撥屬州所轄弘治十年正月以

題奉

孝宗皇帝聖旨是州名與做太倉仍屬蘇州府欽此

又查得正德七年七月內為急修武備保固地

方事該南道御史汪正奏稱直隸太倉州宜設

兵備副使一員於太倉州駐劄以備防禦等因

該本部議擬添設副使一員於浙江按察司列

銜支俸專在太倉州駐劄後該都御史王 具

奏裁革至嘉靖三等年節該吏科給事中曹懷

南京兵部尚書王 各題要將兵備副使照舊

添設節奉

聖旨兵備官不必添設欽此俱經欽遵外今該前因

為照太倉州先年設有兵備副使一員駐劄該州不惟隄備倭寇亦以緝捕鹽徒况近年以來太倉崇明江陰通泰沿海居民視海洋為莊衢據沙州為巢穴往往招納亡命聚集兇奸興販私鹽流劫商賈而其海船駕使則來如鬼魅去如風雨及至官軍知而捕捉則已得利而歸動經千里莫曉踪跡若非覺察於巢穴之所計處於根抵之近則大奸巨猾倏去倏來者誠為不可即得今給事中朱隆禧復有此奏者實所以彌一方之虞相應議處至於創立州治相安已

久今欲改正况事在彼中遽難定擬覆奉

欽依照舊添設兵備副使一員專在太倉州駐劄照

例請給不坐名

勅書一道前去欽遵行事仍行彼處巡按御史會同

親詣太倉地方從公查勘前項州治應否改正

具奏

定奪

軍職永遠充軍子孫二十

一嘉靖十五年七月內兵部題該巡按陝西御史

周 題為申明

詔旨查革冒濫還職官員以申國法事奏稱陝西
西安後衛左所副千戶楊世榮等犯該永遠充
軍着伍遇革例應原衛隨住子孫不許承襲
乃朦朧還職乞要通行查究等因該本部
嘉靖十年十二月內題

准今後軍職犯該永遠充軍問擬明白不分監故發
遣雖遇

赦宥子孫照舊一體不許承襲其前永遠充軍數內
或有追贓不完未經發遣或有路途病故未到
配所及遇

恩例放回寧家隨住者官職雖不許襲其軍役亦該
免其解補又查得嘉靖九年十一月內該巡撫
雲南都御史顧題為申明舊例以惠邊方事
本部覆議今後軍職有犯該真犯死罪典刑或
饒死永遠充軍者子孫照舊不許承襲外其有
止犯前項例該永遠充軍但係洪熙元年以後
陞職者照依前例子孫不許承襲若係洪武永
樂年間有功之人子孫有犯問發永遠充軍者
不拘監故發遣遇革免贓充軍雖後無永遠字
樣而革前問永遠充軍者除本犯子孫亦照前

例不准承襲許令各該衛所將有功之人次房
無碍子孫及備抄原犯招由連人保送赴部承
襲查議明白於祖職上量降一級承襲如無次
房者卽行停革不許承襲若犯人遺有該追錢
糧就令襲職之人照數扣俸還官已經通行遵
守外今該前因相應申明以永遵守等因覆奉
欽依仍將嘉靖十一年題 准都御史顧 奏議事
例通行在京在外衛所一體遵守及行各處撫
按衙門查照施行其各該衛所官員敢有仍前
朦朧將永遠克軍子孫保送及應取次房無碍

子孫刁難求索從重究治

軍職立功并應襲入學 二十一

一嘉靖十五年七月內兵部題該歸德衛指揮盧
鵬題爲建言民情等事題稱本衛官有立功貪
賊降級爲民者情真罪當供卷盈籍歷歷可考
千方百計覬覦貪緣該追賊者上司明文切迫
而不肯納贓仍復朦朧 及將保
舉襲廕乞要通行痛加懲創 及將應
襲子孫送學習禮讀書比之生員別加課程庶
使世襲之家稍知廉耻他日爲寤不敢貪淫矣

身語卷三
等因本部議得武職犯該立功降調爲民等項
不許管軍管事已有前項

明例通行遵守但恐日久人玩各衙門奉行未至致
有前弊相應再行申明覆奉

欽依今後軍職犯該立功降調爲民等項申

奏乞示卽便發遣依限責取收管繳報查考內有
應合追贓者嚴併完納毋得縱容遷延致生奸
弊其立功者候限滿回衛日後果能改過自新
一體選用爲民者候年六十或終身之日子孫
照例襲替各不許畝緣管事朦朧起送違者叅

究治罪仍行提學等官查照節行事例將廢襲
子孫并出幼考送各府衛州縣儒學肄業比與
生員別立課程時加考較務在精通韜畧習知
禮義以圖實效不許虛應故事

武職克軍遇革閑住 二十二

一嘉靖十五年十二月內兵部題該巡按浙江御
史張景題陳愚見以裨時政事題稱罪有大小
故律有輕重至精至嚴不敢改易者也臣聞死
刑而下莫過於克軍蓋罪至克軍惡亦異矣夫
文武官職雖殊其作惡犯法則一今文官有犯

職私多者問發克軍遇革不得復任惟軍職之
官雖問克軍遇革尤得管事是以不才者易於
犯法也乞要照依文職事例只許免其克軍仍
今回籍閑住終身不得再用直至身死許今襲
替其在各邊衛所如有改過自新委身効勞斬
獲首級能立邊功者照例陞賞本部議得武職
犯該克軍遇蒙還職及事故之日子孫許襲祖
職已有見行事例今張景復論前因無非嚴法
今以懲奸惡之意相應再行申明覆奉
欽依行南京兵部并各處撫按問刑衙門查照節次

題

准事例凡所屬武職官員有犯問擬克軍者雖遇
恩例免軍釋放該衛隨住不得復還原職以後獲有
斬首軍功一體陞賞仍候終身之日查無永遠
字樣方許子孫承襲祖職若有故違前例朦朧
還職管事者經該官吏一併叅究治罪

責安南朝貢 二十三

一嘉靖十五年十二月內兵部題該浙江道御史
余光奏為

請申廟謨以討安南事該本部議得本官奏要先行

練兵蓄糧查與本部會議得大畧相同其要備而勿用諭以禍福責其朝

貢宥其前過以夷蓄之反覆議論無非為國安民之意覆奉

欽依查照原議行令各處巡按御史會同巡撫都御

史預先處備兵糧并咨戶部轉行各省多方處

備糧草及將前項事情從長計處待

勅使至彼選委忠義能幹人員伴送前去查勘宣布

朝廷恩威諭以順逆禍福若能悔罪輸誠納貢入

朝則宥其前過止而勿討如其稔惡不悛星馳奏

請定奪

郡王民校徵銀雇募

二十四

一嘉靖十五年閏十二月內兵部題該

吉府原焗奏為乞

恩查例賜撥官員民校事本部查得嘉靖八年正月

內為廣

德意以彌災異事該巡撫河南都御史潘 題本部

覆議題

准各處

王府民校不分原當見僉及逃故消乏等項并見

奉勘合及以後新封應僉民校每名每年俱於均徭內帶徵銀一十二兩解發該府雇人應役又查得嘉靖八年六月內為集眾思以革宿弊事該本部題

准 藩府民校

郡王應得校尉二十四名額有護衛原係護衛僉撥者就於本衛僉撥不係護衛僉撥者護衛僉與軍餘十二名民間僉派十二名無護衛處俱於民間僉派每名每年於均徭內帶徵銀一十二兩解送布政司轉發該府雇人代役俱係見

行事例及查

吉府原無護衛今該前因相應議處覆奉

欽依行移湖廣布政司轉行該府州縣照例僉撥民校二十四名每名每年於均徭內帶徵銀一十二兩解赴

光化王府雇人代役

糾論濫薦將官 二十五

一嘉靖十六年六月內兵部題該陝西巡按御史胡守忠題為論劾大臣濫舉犯罪逃匿將官以正國法事題稱南京禮部尚書霍韜奏舉邊

將趙廉時陳切照陳時先任涼州副總兵酷暴橫行貪殘成性打死無辜馬淮等二十四名侵盜邊儲六千餘兩倚威而強奪良人子女違例而封撥筮死軍職侵漁民利役占軍人妄殺來降引惹邊釁已該前巡按御史張鵬奏行總督撫按等官會勘人犯逃匿未獲窮凶極惡死有餘辜而韜也乃敢獨犯公議疏名論薦且以不識其面惟聞將畧頗長爲言原其心實欲假公以濟私論其跡似涉納賂而黨惡伏望

皇上窺韜濫薦之章正韜欺罔之罪仍乞通行內外緝事衙門及各處監察御史嚴加緝訪如遇時陳逃住在彼擒拏解問等因該本部覆議合無通行內外緝事衙門并各處巡按御史嚴加緝拏時陳問理再照時陳先以軍功歷陞前職撫按等官節有保舉彼時謀勇亦頗著聞以故霍韜等止據前項風聞如此具奏無非愛惜將材之意其中有無欺罔應否罪罰難逃

聖明洞察臣等不敢定議等因題奉

聖旨是時陳行各處巡按御史挨拏解送會勘霍韜等論薦旣出風聞俱免查究欽此

南京馬快船料付部南糧官順解 二十六

一嘉靖十六年九月內兵部等衙門題該南京兵

部尚書王 題為查處船隻事宜以蘇軍民困

苦事本部覆奉

欽依行移各該撫按衙門嚴督司府合屬衙門將南

京江淮等衛馬快船隻工料銀兩每年付部解

南糧參政等官與同戶部錢糧一同交納如有

拖欠先回聽該部提問參奏

指揮毆打監兌主事及教養幼軍夷人_{二十}

一嘉靖十七年七月內兵部題該戶科給事中樊

深題為慎武威崇教養以變古習以隆

聖治事題據江西巡撫都御史胡 題稱南京龍江

右衛指揮僉事陳欽等在於望湖亭議卑開兌

報要加增米銀毆打通判趙德夫等進入分司

并鄭主事混打額破血流乘勢將居民樊湖王

潮等衣服搶劫又鳴鑼吶喊在街嘯聚等因臣

竊惟

國家之御養武士蓋將以備亂而防患也今觀兌

糧指揮陳欽等止利小財幾成大變蓋上巳不

知有

君天下豈復知有臣哉平居無事已不識法度爲何物一旦有事而欲望其出死以報

國哉若不審見而早圖之則將來之事或有甚於此者乞要轉行天下提學提調等官將幼小軍丁應襲官舍一體加意順習至於口外夷人先年有歸順中國者亦須教養其子弟變化其夷風仍行各邊總督總兵及內外撫按等官其御養軍士於凡體恤必欲其周防護必欲其密賞罰必欲其公賜予必欲其速甘苦必欲其同勞佚必欲其均務使待士如子士戴如父或遇官

軍有犯亦不可專事姑息要當懲一戒百如

問擬等因該本部議得兌糧官軍毆打制使聚衆呼噪搶奪財物干犯

國憲罪不容誅已經部院等衙門題奉

欽依通行究治外今給事中樊深條陳前因具見本官因事獻忠訐謀遠慮誠消患於未然之道也相應依擬覆奉

欽依通行各處巡撫都御史將所屬衛所應襲官舍及幼小軍丁行今提學提調等官加意訓習如無武學去處就於鄰近儒學或別立社學名色

廣擇師儒限以課程從實鼓舞使知尊

君親上之意其保定等府地方原有歸順夷人巡撫

官亦要選其子弟一體教養以變夷風本部仍

行各邊總鎮巡撫轉行各該將領等官將所部

官軍悉如所言加意體恤如遇官軍有犯決不

可專事姑息務要如律問擬以正紀綱

大臣巡邊御史閱視邊

二十八

一嘉靖十八年二月內兵部題為慎選擢以重民

兵事查得先該本部題該刑科給事中李舉奏

要比照舊規點差給事中前往各邊巡視

廢弛警戒將官貪_此該本部議得凡遇_是之

年請

勅各邊盤糧給事中御史將本鎮軍馬器械逐一閱

視并體察將官賢否具題奉

孝宗皇帝聖旨各邊只着每年巡按御史閱視具奏

欽此續該本部議擬

欽依事理請

勅遼東宣府大同延綏寧夏甘肅各該御史舉行等

因弘治十二年五月二十三日具題奉

孝宗皇帝聖旨是每三年一次閱視欽此又為禦外

寇以防內侵事該兵部員外郎李源建議要將
河南山東二省武備差官請

勅分投前去整理本部議得請

勅各該巡撫都御史在省城者責成三司掌印官在
各衛者選委守巡官員前去督同衛所掌印軍
政官員將守城見操并一切公務役占及官軍
餘舍通行查出精選委官管領操備先將委官
職名及選過操備人數開報本部以憑另差屬
官前去查考等因弘治十六年七月二十四日
具題奉

孝宗皇帝聖旨是各都司衛所武備廢弛日久俱要
整理休再議處停當來說欽此又該本部議得
近年以來天下安於熙皞有衛之名無兵之實
武備久廢不獨西北一帶誠如

聖諭所云合無通行各處撫按官員各委布按二司
守巡公同親詣各該衛所督同掌印軍政等官
將守城見操并一切公私役占官軍舍餘通行
查究逐一揀選精壯之人編定隊伍推委老成
公正指揮千百戶管領守城操練合用軍器悉
與盡心整理應用事完開具總數奏報本部仍

行各該巡按御史再加閱視明白開奏以憑勸懲等因弘治十八年九月初五日具題奉

孝宗皇帝聖旨是着各該巡撫巡按好生用心整理恁部裏還責完報差官閱視若有違慢的指實叅究來說欽此又該本部議得南北直隸及山東等處十二省腹裏地方承平日久兵政日廢且如先年鄧茂七劉千斤之徒起自鄉民嘯聚至虜天兵遠征地方瘡痍搬運未息警報旁午西北有胡虜之憂水旱相仍東南有盜賊之患惰慢兵備皆當整理合無照例請

勅宣大遼東延綏甘肅寧夏各該巡按御史查照本部節次奏行事理躬行徧歷逐一閱視某鎮士馬精強邊境完固某鎮士馬消耗邊備弛廢自正德四年以前損壞城池墩堡若干器械什物若干曾否修築修補有無完固堅利其大小將領官員某人謀勇廉能某人貪饕廢事務秉公心閱視訪察照舊書圖貼說造冊奏繳其南北直隸及山東等十三省就該撫按等官選編軍伍修理器械各具本冊奏繳前來欲再差官閱視不無官多事擾合無請

勅各該清軍御史督同三司守巡官員親詣按屬地方將前項城池軍馬器械武備照依各邊事例一體閱視訪察備造圖冊奏繳中間廢弛事宜應該更張損益小則從宜區畫大則開款具奏務在武備修明緩急有賴毋得徒具虛文等因具題奉

武宗皇帝聖旨是欽此正德十三年又該本部議得修舉武備禁革奸弊之法備載

憲綱自該巡按御史按察司舉行且係舊規遵行年久弘治十二年給事中李舉查知舊典當遵建

議差官巡視邊備體察賢否已蒙

先帝聖朝只着每年巡按御史閱視具奏彼因本部亦失察照閱視武備係

憲綱該載巡按御史當行事務創議請 勅復蒙

先帝聖意仁慈每年請 勅煩

特令三年一次閱視後該員外郎李源奏

准河南山東二次

勅巡撫都御史閱視正德四年又該本部尚書曹

題 准各邊請

勅巡按御史閱視其腹裏南北直隸并山東等十三

省請 勅清軍御史閱視三年一次舉行正德
十年例該閱視各官內有正德十二年終方纔
閱視完畢奏到者今正德十三年又該閱視之
期臣等查得前例係正德四年尚書曹 等創
奏新例伏覩正德五年九月十八日欽奉
詔書內查革改正事理前例相應革除改正合無將
前新例改正不必舉行凡有閱視修舉武備事
宜悉遵舊例

憲綱內開載事理并前項欽奉

孝宗皇帝聖旨只着每年巡按御史閱視具奏事理

欽遵施行等因正德十三年三月十三日奉

武宗皇帝聖旨是官不必差只着該年巡御史閱視
具奏欽此節年俱照正德十三年題

准事例欽遵外嘉靖十八年該吏部咨為 傳奉事
該司禮監太監溫祥傳奉

聖諭朕巡幸承天府念邊方事重已命兵曹地曹大
臣總督戎務備防虜寇茲特起原舊輔臣大學士
翟鑾兼行邊使奉朕命以往寫勅與他將銀若干
勞賞官軍並恪修邊務閱視城池點驗軍器譏察
奸細以防不虞該部知道欽此傳奉到部遵奉

欽依命行邊使翟鑾前去遼東薊州宣府大同偏頭
等三關延綏寧夏陝西甘肅各地方翟鑾閱視
外其餘直隸及浙江等十三布政司地方合無
仍咨都察院通行各該巡按御史照依本部前
項題 准事例查照 憲綱內開載事宜欽遵
閱視具奏奉

聖旨是欽此

禁止濫給關文 二十九

一嘉靖十八年四月內兵部題該巡按直隸監察
御史洪垣題爲議處驛遞以蘇民困事題稱各

處諸司關文太濫擅撥船馬取索驛遞吏胥爲
奸今後各處都布按衙門不許濫起關文其奏
事公差人員應給關者俱赴撫按衙門掛號在
京回還水路赴天津兵備陸路赴近處撫按衙
門掛號仍行各處巡撫巡按巡江巡河等衙門
凡遇經過官員人等非係

欽差公差冒名假借一船數關賣夫折乾盡行禁革
府州縣將給散各驛遞錢糧按季造冊繳報撫
按衙門不時稽查該本部覆奉

欽依准行

處備護送

梓宮官員合用船馬條款

三十

一嘉靖十八年四月內兵部題為欽奉

聖諭事准禮部咨本年五月初二日恭奉

玄宮引 發吉日用今月十七日子時奉掩

玄宮閏七月初二日寅時與獻使等官仍用原定官

員一應禮儀亦且用原定者如有增損臨期酌

擬但改水程奉

梓宮行欽此又准禮部咨嘉靖十八年五月初二日

恭奉

聖母梓宮南 柎從水程行着內官監左監丞閔綬

錦衣衛指揮使趙俊前往南北直隸山東江西

湖廣自通州起直抵承天府沿途一帶地方督

率鎮巡等官整理河道船隻人夫并廩給口糧

等項一切緊重事情務要預先齊備不許縱緩

致悞有怠忽的指名即時奏來治罪及寫勅與

他禮部速示各該衙門知道欽此臣等切思

梓宮南 柎自京師以至承天府地方遼遠其載捧

梓宮儀仗等項合用船隻人夫及內外衙門扈從官

員人等合用廩糧船隻人夫馬匹等項若不早

為預備誠恐臨期悞事合就開具條律上

請本部仍通行監丞閫綬指揮趙俊一體遵照中間未盡事宜悉聽二官臨時斟酌議處施行等因本月初七日奉

聖旨是都准擬行欽此 梓官由水路該用船隻查得工部見在黃船十隻已經該部處議具題奉有

欽依改造一隻裝奉 梓官外其餘九隻合無本部一併分撥臺輿儀仗等件其內外扈從人員船隻今查得本部見在聽用馬快船止有三千餘隻不足應用已經差委員外郎張鐸前往張家

灣一帶將官民船隻量行拘留聽用通候內外各衙門文移到日本部斟酌撥用除馬快船原係各衛旗軍支有行糧前來無從議處外其黃船十隻旗軍三百七十名合無行戶部驗口計程關給行糧前去其官民船隻原無工價合無經過州縣每船給與過關米五斗各項船隻俱經本部出給勘合一張給與船頭沿途執照支取其經過驛遞衙門錢糧原少不堪答應前項過關米石俱行有司措辦應用不許重複冒支一水路合用人夫各該撫按官員酌量地方程途

遠近每處編集精壯人夫七八千名聽候應用
其拽送

梓官船隻該用人夫不拘數目臨時酌處外其黃馬
快官船每隻上水撥夫四十名下水三十名民
船每隻上水撥夫三十名下水二十名俱本部
勘合填註有司查照兌給不許分外多索致擾
地方倘遇風雨灘淺難行臨時量行摘撥應用
一南行船隻除黃馬快船自通州起直抵承天府
其官民船隻原係一時拘用似難長行合無本
部馬上差人咨行南京兵部分撥馬快船三百

隻關給行糧星夜差官押至儀直地方聽候

梓官至日官民船隻照數兌換前去

一內外 扈從官員人等合用廩給口糧各該撫
按預備應用本部照例起關應付其內外大小
官員有願支折色自備廩糧者查照近日承天
府折色事體每廩給一分折銀二錢口糧一分
折銀五分定為則例通行各該有司遵守
一內外官員敢有分外求索銀兩多要過關米石
勒要人夫數多賣放折乾等項情弊及各該地
方官員乘機科罰驚擾地方者悉聽科道官及

監丞閔綬指揮趙俊即時鞫問叅奏俱各坐贓

治罪

一自京師由陸路至張家灣合用人夫車輛本部
劄付順天府動支在庫官銀雇募本等夫車聽
用俱候本部明文查照撥給本府坐委能幹佐
貳官專理不許推委遞運所官臨時誤事其應
用馬匹暫借團營騎操三千五百匹內將二千
五百匹送後府撥與內府錦衣衛人員騎坐馬
一千匹送會同館撥與府部各衙門人員俱不
許臨時違誤

添設興都留守司及顯陵衛三十一

一嘉靖十八年五月內兵部題為 傳奉事本月
初八日該司禮監太監張佐傳奉
聖諭顯陵衛仍作承天衛顯陵衛別議建治兵部便
議處來說欽此查得

天壽山 陵寢衛分舊例該於在京衛分開具二衛
請

旨點一衛前去護守今該前因臣仰惟承天府
先皇封城德澤淵深衍慶鍾祥聖人首出誠宜府衛
並設文武備官欲照例分撥京衛官軍恐程途

寫二衛上請
寫遠北人不服水土謹於承天府附近衛分開

宸斷查得荊州左衛荊州右衛俱各附近伏乞
聖明於內點用一衛改定衛名前去護守移咨工部
侍郎顧璘并巡撫都御史陸杰及行巡按御史
朱箠會同相看承天府空閑相應地方作速修
建衛所衙門起蓋營房合用錢糧徑自裁處其
官軍俸給月糧卽將原衛者改撥應用該衛屯
田及中間有原撥別處備禦官軍并應該隨住
餘丁等項事宜一併議處徑自奏

請仍咨禮部將該衛所指揮千百戶及經歷衛所鎮
撫合用印信查照鑄給舊印行令

奏繳等因題奉

聖旨是荊州左衛改顯陵衛其餘都依擬行還照鳳
陽事例建置畱守司統轄諸衛所餘部裏便查議
來聞欽此竊惟鳳陽府

聖祖龍興

皇陵攸在是以建置畱守司統轄諸衛以擁護
陵寢防守地方今承天府
皇上龍飛之地

皇考 皇妣陵寢寔在焉比照鳳陽府建置留守司
實為相應伏望

皇上定錫司名仍行侍郎顧璘都御史陸杰御史朱
箎即於承天府相度相應地方起蓋留守司衙
門一處本部銓選正副留守各一員協同僉書
都指揮同知一員吏部選銓經歷都事斷事正
司獄各一員禮部鑄給留守經歷司斷事司司
獄司各印一顆該布政司撥知印承差六房及
各司吏典就令統轄

鳳陽承天二衛擁護

陵寢留守官員與撫按三司及知府等官文移體統
并本司官吏俸給悉照中都留守司舊規施行
臣等又查得鳳陽地方中都留守司統
皇陵鳳陽左鳳陽右留守左留守右懷遠長廬淮慶
洪塘等九衛所擁護

陵寢防守地方今承天府建置留守司止擬統轄前
項二衛似為太少但承天府附近如荊州右襄
陽襄陽護鄖陽沔陽德安等衛所皆係湖廣行
都司統轄先年湖廣河南陝西四川四省交界
地方山川險曠盜賊生發難於緝捕是以於要

害鄖陽地方建置行都司統轄諸衛禁戢盜賊
事干地方不敢擅議割屬畱守司統轄其湖廣
都司所屬衛所如武昌左武昌護黃州等衛不
惟去承天稍遠其官軍亦俱係靖州清浪郴州
等處上班事干邊備亦不敢擅議割屬蓋鳳陽
地方全在腹內又別無都司其畱守司擁護
陵寢兼防守地方湖廣地方半多邊圉又二都司設
立已久關係地方邊備臣等愚昧以為今置畱
守司統轄二衛專以擁護

陵寢二都司統轄諸衛仍令防守地方等因題奉

聖旨司名之曰與都畱守司依中都司序設官軍俱
依擬欽此

公薦將材 三十二

一嘉靖十八年十一月內兵部題為公舉薦以求
將材事照得本部推用各該將官除武舉初授
者外其餘俱要曾經大臣科道撫按等官奏薦
方得查擬但大臣科道會薦類歲間行撫按等
官於諸武職則往往深避嫌疑易劾難薦至或
有薦不一二而劾已五六者亦有失於加察而
薦至方以薦而任即以劾而罷者合無在內行

科道官在外行總督提督撫按等官將所在指揮以上武職官員不係納級加陞者不拘見在養病閑住會同查訪堪為將材之選者逐一開列姓名分別年力藝勇能幹操守器識五項明白填註仍總註保語及堪任主副叅遊都司守備邊方腹裏衝要簡僻等項於後共秉公心務協輿論在京限半月以裏南京及在外各處限文書到後一月以裏各會本具奏以憑施行奉聖旨揀將用人本兵職務着只照舊規從公舉用在外總督巡按官照常保舉近年各處將官黜落太易以致乏人今後被劾官員你部裏須加查訪斟酌不得一槩議罷欽此

承天守備體統照鳳陽例 三十三

一嘉靖十九年正月內兵部題該守備承天太監傅霖題為懇乞天恩裁正禮體添設勳臣協守根本重地事題稱乞

勅禮部查得南京鳳陽事例詳議奏請

聖裁詔示轉行湖廣三司等官并承天府畱守等衙門今後與臣叅見禮儀并相會座次及往來文移俱依鎮守體統而行早乞

簡命勳臣一員前來守備等因具題臣等伏惟

睿宗獻皇帝

慈孝獻皇后 二聖陵寢寔在承天臣等仰遵

聖斷比照鳳陽

皇陵事體特設內臣守備一員及 興都畱守司衙

門銓註畱守正一員畱守副一員協同僉書指

揮一員瞻奉守護又耶裏等處守備原該本部

議擬題

請比照 天壽山事體往來承天守護

陵寢其南京係

太祖高皇帝開基根本重地與南北兩都並建是以

府部院寺諸司各備又該置內外守備叅贊等

官事體特異所據太監傅霖奏稱要乞

簡命勳臣前去守備事體隆重臣等不敢擅擬及查

得鳳陽 皇陵守備內臣

勅書內開一應該管事體務與 中都畱守司官計

議而行其餘地方軍衛有司事務不必干預

天壽山守備內臣 勅書內開命爾與都指揮在於

本山守備俱未開載節制畱守守備等字樣及

查得興都畱守司統轄衛所先該本部議擬題

有 欽依俱難別議所據本官奏要請換

勅書將添設畱守祠祭等衙門并改添

顯陵承天二衛該載在內合候 命下查照鳳陽

天壽山守備事體請換 勅書一道賚捧前去交付

欽遵行事其本官奏與各畱守守備有司等官

相見禮儀行令查照鳳陽 皇陵守備內事體

施行等因奉

聖旨是勲臣不必添設守備內臣職任體統都着照

鳳陽天壽山守備例遵行換勅與他欽此

奉 旨暫罷武舉鄉試 三十四

一嘉靖十九年二月內兵部題為武舉事照得嘉

靖十九年例該天下開科武舉鄉試相應預行

都察院并南京兵部各處巡撫都御史及浙江

等布政司順天應天二府各照本部前科會題

准事例備將前項武舉鄉試條格通行各該衙門依

期遵照舉行題奉

聖旨武舉連科舉行未得人暫罷欽此

准借騎操官馬 三十五

一嘉靖十九年四月內兵部題該雲南道御史胡

桓題為乞申舊禁以裨軍政事題稱凡各省解

到軍人率皆京中卑弱游食妄為頂替而解批保結徒為虛文益解軍利於回籍替軍利於月糧以致襲奸踵弊視之為常及稱軍人領有馬匹者率皆重以射利不復知為官畜蓋關領草料賣入私囊貸與官民再圖厚值乞要申明舊例嚴加禁約等因具題本部覆議照軍士馬匹乃武備急圖軍國要務節年禁例不為不嚴但禁例雖嚴於立法之初玩愒每生於因循之後今據本官所陳深謀遠慮甚切時弊相應議擬覆奉欽依申明禁例出給榜文張掛仍轉行緝事衙門并

五城兵馬司嚴加訪察但有仍前將騎操官馬雇借與人騎馱等項恣肆作踐者即時捕獲到官轉送法司照例枷號治罪追罰馬匹各該管把總官員不行嚴加約束及縱容不舉事發通行指實參究及行各省巡按御史今後司府州縣清解京操補伍軍丁務要揀選精壯親丁批內明開年甲相貌責差相應長解起解赴部審實發營補伍果有在京游食無籍之徒頂替代當該衛指揮等官扶同作弊縱令正軍逃回者一體緝訪照例參送治以重罪

洪武年間功陞軍職後犯典刑子孫准襲三十六

一嘉靖三十三年三月內兵部題為懇乞天恩豁

襲祖職以圖補報事該騰驤左衛舍人喬應龍

奏稱臣始祖喬玉洪武二年從軍故高祖喬順

補役二十二年七月奉

天征討守安定門克懷來八月克雄縣漢州攻圍真

定陞小旗接應永平十月克太寧十一月鄭村

壩大戰全勝陞總旗取廣昌洪武三十三年正

月取蔚州攻圍大同四月白溝河大戰全勝五

月攻圍濟南功陞百戶十月克滄州十二月克

昌大戰洪武三十四年三月夾河大戰有

正千戶閏三月軍前典刑高祖喬林舊名觀音

保永樂元年優給九年

欽准襲正千戶故曾祖喬成優襲正統六年給授

世襲

誥命一道九年迤北征進功陞指揮僉事故曾祖喬

永優襲老伯祖喬梁襲故叔祖喬松於嘉靖二

十九年八月二十三日病故該衛將臣以喬松

嫡親姪孫保送到部未蒙准襲臣查得武職人

員但係洪武永樂年間授職者子孫永為承繼

雖無軍功亦不減革切思祖喬順起自洪武年
問累有戰功歷陞正千戶職事從征夾河偶爾
典刑比之餘年別項爲事待問典刑者情實不
同以至永樂元年優給九年襲職必在收錄相
沿數輩世授

洪恩至今一旦停減情實虧苦乞要查例襲職以圖
補報等因本部查得嘉靖三十一年九月該本
部條議一明罪過以定減革查得問刑條例軍
職犯該真犯死罪典刑或饒死充軍者子孫不
許承襲又查得弘治七年 令凡犯劫盜問刑

明白者不分典刑監故子孫永不許襲嘉靖十
年題

准今後軍職犯該永遠充軍者問擬明白不分監故
發遣雖遇

赦宥子孫照舊一體不許承襲二十一年題

准問擬假與人官斬罪者不分典刑監故俱揭黃子
孫不許承襲及查得節年事例有失機人命強
姦問擬絞斬死罪監故者子孫得以襲職調衛
切詳條例無非緣情定法既謂真犯死罪不許
承襲其律應死罪監故者未正典刑已爲倖免

乃復令其子孫承襲何以繩奸警惡為畫一之法已經通行內外問刑衙門今後軍職犯該人命失機強姦真犯死罪饒死充軍問擬明白不分典刑監故子孫俱不係承襲例前襲過者候子孫襲替之日一體查革今該前因查得騰驤左衛舍人喬應龍伊祖從軍立功陞職典刑襲替來歷與黃選相同又查得洪武永樂年間凡軍職受命陞除職級子孫永為承繼雖無軍功及功無擒斬例不減革及查近因題

准前例內開今後軍職犯該人命失機強姦真犯死罪及饒死充軍問擬明白不分典刑監故子孫俱不許承襲例前襲過者候子孫襲替之日一體查革但未有定議分別年分以故本舍未經收選切照爵以詔功賞延于后自古帝王之取天下未有不重乎此者也况

國家開創之初用人之際賞罰在所並行而功過自不相掩中間有因事故處以軍法者隨即錄其子孫未嘗終棄蓋罪疑惟輕功疑惟重固我祖宗創業圖治鼓舞人材之至意也迨夫洪熙以後

武職雖各獲有軍功比之開

國者已大不同且法制既定律例又明所犯多出故違論法自難輕宥若不權其輕重分別定議其何以仰承

國家報功之典而使人有畫一之守哉所據喬應龍伊高高祖喬順原在洪武三十二年奉

天征討累有戰功歷陞正千戶三十四年夾河軍前典刑比與洪熙以後承平犯法待問典刑者委有不同以至永樂元年高祖喬林舊名觀音保優襲正統九年

欽准襲正千戶當時已在優錄會曾祖喬成優襲正統九年迤北征進功陞指揮僉事曾祖喬永伯祖喬梁叔祖喬松一向沿襲即今子孫無犯似難議革相應議

請覆奉

欽依將喬應龍准令昭舊收選仍通行內外問刑衙門今後軍職犯該人命失機強姦真犯死罪及饒死充軍問擬明白不分典刑監故子孫俱不許承襲其有例前襲過者若係洪武永樂年間有爲事典刑或監故充軍等項就在洪武永樂

年間相承襲過者子孫照舊承襲若係洪熙以後有爲事犯該人命失機強姦強盜真犯死罪及饒死充軍不分典刑監故子孫雖經襲過不拘三輩五輩候子孫襲替之日一體查革各都司衛所自文書到日爲始務要遵照今題事理永爲遵守如遇前項子孫告保即便查照施行應起送者且結起送應省發者就使省發隨生不許隱情朦朧妄保查出照依律例問擬

撫處安南附後

撫處安南叛蠻 三十七

一嘉靖十九年十二月內提督兩廣軍務右副都御史蔡 題爲遵奉

明旨以議處安南事據監督中哨軍務廣西布政司右叅政翁萬達呈據委官指揮使王良輔知府江一桂呈稱節奉牌案備奉軍門檄問行委職等傳諭安南審接夷目莫登庸回報投降聽處情詞是否真實莫登庸始則憂危繼尚猶豫似欲延緩我師彼蒙軍門親臨近邊相度便宜分

委監統諸軍水陸並進龍馮思陵三哨連營列壘威武振揚兼且關隘嚴謹謀使間發登庸遙度我兵壓境乃益洵懼亟請出境降服聽候處分情甚哀懇職等稟蒙軍前於本年十月二十八日允令彼國小日陳裴等恭詣念涯等營蒲伏陳款蒙示十一月初三日准其來降職等乃預於鎮南關近地張開幕府高築將臺俟候軍前進止至期莫登庸素衣繫組躬率小日耆士人等亦各以尺帛束頸候于南關墾要職等教以儀節乃令於關樓之上設位演習職等特

軍前稟蒙劄兵去關里許士卒無譁軍容嚴整儀物備盛乃於臺上恭設

龍亭覆以

黃幄中立

令旗令牌前置香案兩廣三司副叅監統衙門并齋執旗牌官分班列侍傳令開關登庸暨其姪莫文明并小日耆士人等由關道左出脫履跣足面北而跪職等稟准傳遣生員謝天縱為解其組及接受降本登庸乃俯伏五拜三叩頭畢伊姪并小日耆士人等亦各以次降服如儀合

國夷民引領於彼國關口若崩角稽首者又不知其幾萬人也少頃登庸仍率其姪并小目耆士及槩國夷民恭向軍前俯伏再拜當蒙

宣諭

朝廷恩威及軍門號令姑容戴罪還國待為轉奏賜以不死登庸俯伏再拜稱謝回還訖隨蒙監統諸司按臨關界登庸倉惶脫履跪迎俯伏再拜而謝蒙兩廣雲南諸司恐有法外奸細并玩法土官乘機嚇詐及生事造言者宜一切勿聽我天朝正大之體軍門嚴明之法汝宜知之等語登庸

跪聽畢又俯伏再拜叩頭而謝職等乃傳令閉關收兵回營其伊姪莫文明并小目從人許三省阮簡清阮延祚楊諫等共二十八人莫文明代齋登庸降本一通小目阮如桂杜世卿鄧文值等另具降本一通俱經稟蒙委官押送前赴欽差軍門投遞并將彼國申文結狀各另繳報及組一條封繳本道外為照夷目莫登庸梟雄狙詐恃險乘危僭號紀元妄自尊大父子相繼今且二十餘年矣一旦躬率國人投降乞死情詞卑順似出衷誠實由我

皇上聖德懋昭神武於赫

欽差大臣計謀遠算運用不窮而監統諸司又皆戮力用心動作有紀兵方陣而未加糧已集而不費乃能使遠夷稽顙款塞自縛乞哀考之前古夷狄雖有投降未聞若是其恭順者也以此而書之史冊固足以傳播當時昭示來代且於我成祖之列爲有光焉職等得於目觀喜幸不勝等因據此隨看得莫登庸申爲投降乞恩宥罪事內稱登庸荒徼細氓限於知識然每遙瞻北極光被南邦天清地寧海晏河潤登庸仰知

中國有

聖人久矣况

天威震動之下而有陽春駘蕩之仁懼感交并曷可云喻登庸竊惟先國主黎氏末運迤邐相繼淪歿至黎庶攝國未幾亦遭危疾臨終倉卒之時苟從夷俗暫以國事付之於登庸登庸又付其子方瀛未及奏

請委涉擅專雖

君門萬里難於

上聞而罪實滔天豈容自昧嘉靖十七年登庸父子

王門謹遣阮文泰等齎

表丐降并祈處分俱出誠心別無虛詐但積誠未
至不能立動

聖心夙夜憂危靡遑寧處嘉靖十九年正月二十五
日登庸子方瀛不幸遘疾而亡國人狃於舊習
欲以方瀛長子福海代領其衆登庸慮前誤相
授受義已不安今若再徇所請負罪益重無以
自解以此登庸與長孫福海惟執其以俟

朝令頃者大將專征重兵壓境登庸猶罔豕何足以
當惟是國人亦危朝夕幸見軍門檄問備奉

天言慈渥無涯拊膺流涕切念登庸有罪黔首無辜
聖慈不忍以登庸之故而駢戮羣黎登庸何幸以羣
黎之故而槩存殘喘已於國內北望

嵩呼率同小目阮如桂等於嘉靖十九年十一月初
三日恭候南關組繫出境詣幕庭而稽首輸中
款以投降登庸本欲躬自赴京瞻

天請死緣已衰老不堪匍匐長孫福海方在喪次不
可遠離登庸謹遣親姪莫文明并先國主舊臣
許三省阮簡清阮延祚等詣

闕待罪亦以見登庸父子往年降表委係畏

威懷德不敢有飾詐之心伏望
矜宥俾獲自新其土地人民皆
天朝所有惟乞

俯順夷情從宜區處使登庸得以內屬永世稱藩及
比照列藩事體歲領

大明一統曆書刊布國中共奉

正朔則莫大之幸也雖登庸先國丁氏陳氏黎氏
逆相沿襲稱號紀元登庸悔悟之餘固知其不
可以經嚴戒國人一切革除聽候

新命豈敢仍蹈往謬自速

天誅比者登庸聞廣東欽州知州林希元奏稱如昔

貼浪二都漸凜金勒古森丫葛四峒係欽州故
地果如所稱唯

命是聽其本國先年缺貢應合類補及以後年分續
貢方物登庸不敢遽以為言者以方在罪中求免

一死尚恐不得耳又登庸與國人欲照
先朝故事備辦代身金銀人獻

上亦慮唐突惟以投降聽處實情具
奏若

天朝原賜本國王印信登庸止宜謹守不敢擅用伏望

垂察登庸不勝戰慄之至爲此理合備申伏乞轉
達等因又看得小目阮如桂杜世卿等申爲懇
乞
天恩俯賜生全事內稱切惟普天之下莫非王土率
土之濱莫非王臣如桂等國人雖處荒隅實賴
覆冒方得並生但去

天獨遠國中往往多難正德嘉靖年來逆臣陳嵩杜
溫潤等迭構亂謀逼脅國主黎暲遇害黎諱播
遷宗氏淪亡獨存黎慮攝國未久亦以病終地
方擾攘生民塗炭至此極矣其時莫登庸討平
諸逆委有功劳然上地人民皆

天朝所昇應以授之登庸而登庸受之又私其子未
及請

命罪復何言如桂等國人亦因喪亂流離之後慮恐
不逞之徒復蹈嵩等往轍禍且不已乃倉卒爲
求生之計自擇其主私相推戴寔出無知其罪
亦與登庸同也後因道路阻絕關禁謹嚴雖屢
具情詞懇求無由
上達罪狀益深致蒙

天威震怒命關專征前年軍門移檄本國登庸父子

天... 恐懼不寧謹已上

表乞降未蒙

俞允茲者復動大將統握重兵勢如 雷霆聲震蠻

嶠自分必就齏粉無復子遺矣豈意曲蒙

恩宥容令輸情監統委官壓境

宣諭合國之人皆相對涕泣扶老携幼祇候軍門願

同登庸東身降服所幸不死是

父母之恩

天地之賜也感戴懼怖豈有窮極如桂等又惟民不

能自治之事必先正名名不正則事無所攝

無所攝則羣然而爭渙然而離者莫之禁也欲

免亂亡其何得哉今

天朝既賜登庸與國人以更生矣若使終於亂亡則

聖明之心必有所不忍者以此如桂等又有拳拳之

私欲瀆

聖聽以為終始生全之地登庸自管事以來稍知綏

輯一國旌倪幸得蘇息今且畏

威悔罪與其長孫福海共候

朝命不敢因襲舊弊擅自攝國及已戒飭日民不復

仍前妄稱號矣竊惟登庸祖孫誠負重罪但今

實已省悔又頗為夷情所歸然非仰藉

聖恩昇之名色何以約束國人使不為亂若鄭惟傑

庸已於國邦為設香火以存黎民之祀若果真

係黎氏子孫合國黎民豈容登庸欺蔽伏望

聖慈垂察

矜憐遠方生靈

俯順夷俗

賜登庸以

新命俾得管攝夷民世世稱藩如桂等亦保有殘生

永為藩民則

天朝生育之恩當與

天地相為無窮矣如桂等幸甚一國幸甚等因據此

會同統督本哨副總兵張經廣東布政司右布

政使楊銓廣西布政司左布政使祝續廣東

察司按察使歐陽席布政司左叅政

糧餉右叅政蕭晚監督海哨副使陳嘉謨監督

左哨廣西按察司副使鄭宗古監督右哨副使

許路總理糧餉右叅議陳茂義統督左哨右叅

將李榮廣西都司掌印都指揮顧邦重廣東都

司都指揮董廷玉軍門取用協助中哨都指揮

張輓統督右哨都指揮白法議照得安南國夷
目莫登庸僭逆之罪中外共知往年提督都御
史蔡奉

命征討經畧諸所便宜誕修文告莫登庸父子亟遣
日人齎執

表狀乞降聽處懼加兵也

聖人在上明見萬里

命下該部題差總督叅贊大臣授以圖計一面勸

處情偽一面調度兵糧示不殺降不廢武也大

臣鎮臨諸司集議錢糧兵馬屬已戒嚴然猶不

遽加進檄問詞嚴義正欲得其情以爲

止導

宸算也繼以夷情自懷猶豫乃分命監統張皇我師

諸路連營尅期并發登庸遂率國人速身投欵

畏

天威也觀其所稱方瀛病死福海侯

命及願去僭號共奉

正朔歸欽州四峒之地事詞頗爲恭順合國之人

又有竝無異詞結狀而登庸之組繫出境俯伏

迎降及遣親姪抱本入

朝待罪情亦懇切其畏

威懷德誠有如各官所呈者但稱乞要內屬稱藩歲

五領

大明一統曆書刊布中國及稱黎氏無人等項事體
關係重大均乞軍門裁處等因并呈繳本結前
來據此臣等看得前項事情委係重大會行兩
廣布按二司會同副叅都司等官再行詳議去
後隨據兩廣左布政使等官楊銓翁萬達張輒
等議照莫登庸父子為惡罪狀先據黎寧鄭惟
憐奏訴該廷臣集議數其十罪法當誅戮奏蒙

皇上赫然震怒

命將出師聲罪致討方當舉事之時而登庸父子即

已上

表乞降深自悔罪願以土地人民悉聽處分蒙提

督軍門具由奏

請該兵部覆議得夷情叵測詞雖卑懇意或詭秘少
涉於僞即為所欺伏蒙

皇上特勅總督叅贊大臣受

命專闡會同提督軍門布德宣威案行兩廣雲南三
司等衙門積備糧餉船馬器械調集漢達狼土

官兵以俟大舉又且檄問登庸父子責其降意不誠傳諭彼國人民使其協力討賊卽今糧餉充盈兵馬四集分判哨道尅期進討而方瀛未蒙

天討已罹鬼誅登庸悔艾愈深情詞愈切自比圈豕願效牽羊伏轅門以請死表衷曲之無他至於削去僞號奉歸侵地俱出真實此蓋我

國家大信素孚

天威遠振而軍門揆文奮武動中事機故能收全功於尊俎訖訖聲教於海曠古罕聞于今獨盛其

所乞

請內屬永世稱藩歲領

大明一統曆書共奉

正朔及獻歸黎氏原侵欽州四峒均乞軍門俯順夷情查照各部原題奉

欽依事理悉爲裁處施行卽所謂君之宗之定經制以整屬其民匪疚匪棘廣式辟以疆理其土庶足以慰遠人向化之誠昭

王者無外之治夷民奠安萬世永賴矣等因到臣據此案查先准兵部咨爲

大慶事該本部會題該少傅禮部尚書夏 題稱討
罪之兵

聖王所不能已蠢茲安南上干

天討聲罪正名已無容議但事體重大合無恭請

宸斷勅下兵部會集多官從長計議慎擇大將妙選

偏裨

簡設總督督餉文臣更置守土官員調集諸路兵馬

所在儲峙芻糧一一區畫俾當上

請定奪等因奉

聖旨是安南國先次詔使不諭而反有傷體面又

不及貢非叛而何兩處差官都依擬着實勘明奏

報便寫勅與他去興師備討必行兵部便會官議

奏欽此欽遵又該太師武定侯郭 奏為竭愚忠

正 國體以明

天討事內稱兵力財用實行軍之要量時而進庶可

成功南征北伐大有不同北伐之兵朝令夕行

亦不為難南征之兵彼處衛所僅能防守必須

先行遣官整備糧草調取漢達土官等兵宣布

朝廷恩威相機進取若復梗柙則大興

天討庶緩急得宜奏奉

聖旨這所奏兵部便會官一併議奏欽此欽遵又該
兵部尚書張會議得兵貴先聲事宜預立合
用漢土官軍近在兩廣雲貴遠則四川福建湖
廣江西糧餉不可不備合無請

勅齎付撫按督同三司將領等官整擗兵馬多方處
置糧草足穀一二年支用等因題奉

聖旨安南國背叛不悛在所必討你每既會議停當
都依擬差去官着實查勘明白就星夜奏來定奪
施行欽此又准兵部咨該都察院右都御史毛
奏爲陳情乞

恩正法以誅僭逆事覆題節奉

聖旨安南國久不來庭義當興師問罪近據黎寧奏
稱逆臣莫登庸篡逆阻絕朝貢未審真僞且着地
方官員從宜撫剿提督兩廣侍郎巡撫雲南都御
史并各總兵官都另寫勅與他欽此又該臣節該
欽奉

勅諭先該安南國黎寧奏稱國王黎暉故絕被賊臣
莫登庸作亂竊據國城阻絕道路因而久廢職
貢已經差官查勘是實近該雲南鎮巡等官捉
獲莫登庸奸細阮璟等及僞造書印具奏前來

的知此賊僭擬名號僞置官屬好生背叛

朝廷罪在不赦特勅爾等各宜遵照該部題請事
理即便調集兵糧多方籌畫分道進兵協力征
剿招撫歸順之人用爲嚮導凡茲撫剿事情爾
等宜相機酌處務要計出萬全期於僭亂底平
罪人必得以彰

天討以安遠夷斯副朕委託之重毋或因循玩愒致
誤事機爾其敬之慎之故勅欽此欽遵俱經會
同鎮守兩廣地方總兵官安遠侯柳 會案行
據兩廣三司副叅等官會呈議處合用兵糧事

宜一面會本具 題一面行左布政陸杰萬潮
右布政楊銓陳卿叅政龔亨嚴時泰叅議周延
田汝成經理糧餉按察司詹瀚副使梁廷振葉
照僉事李文鳳雍瀾處辦軍需副使翁萬達鄒
守愚各臨邊境體察虛實相度機宜副總兵張
經叅將沈希儀都指揮李時整擗兵馬及行營
調分布防守遙振軍威又該臣等爲檄諭事會
行廣西按察司添註副使翁萬達鄒守愚轉行
欽州知州林希元等檄行彼國都城府衛轉諭
莫登庸父子熟思利害審處順逆果能畏

威懷德悔罪向化束身投降即將國中事情明白開
陳不得隱諱其黎寧見據何地果係黎諛第幾
子俱要從實具本伏待

聖裁如或執迷猶昧省改則後至之誅實所自貽噬
臍之悔始將無及去後又准兵部咨為

大慶事該巡撫雲南等處都御史等官汪 等會題
前事據都指揮王守忠呈送安南國頭目范正

毅齋遜莫方瀛投降奏本具 題奉

聖旨禮兵二部看了來說欽此欽遵續為

大慶事該 等據副使翁萬遠等呈據安南國遵奉

檄諭差頭目阮文泰等齎到

表文并長慶諒山府衛抄送

表文印信文書前來內稱本國莫方瀛父子已甘受

專輒之罪謹具本國土地人民實數開陳奏

進伏望

天朝處分為本國臣民立命庶方瀛父子獲釋丘山

之罪而一國人民咸困

天地生成之化等因會議題奉

聖旨安南國降表朕已覽悉這事情禮兵二部看議

了來說欽此欽遵又該鎮守兩廣總兵官安遠侯

柳巡按廣東監察御史王德溢巡按廣西監察御史鄒堯臣各題前事并該巡按兩廣監察御史陳儲秀巡撫雲南都御史汪國公沐各題節奉

聖旨禮兵二部看了來說欽此欽遵又該兵部尚書張會議內開查得原擬

欽命咸寧侯仇總督軍務兵部尚書毛叅贊軍務各請給

勅書并鑄給關防并符驗旗牌令其前去兩廣雲南適中去處會同兩廣

提督及節制各該撫鎮并副叅以下三司等官將各處兵馬通行整飭及合用錢糧漸次從宜會計以備征討軍機重務悉聽便宜若使義旅

張皇

天威宜著莫方瀛父子悔罪請死束身待命前項上表乞降悉以地土人民上聽

天朝處分別無虛詐合國人民亦無異詞

朝廷待以不死總督叅贊大臣作急將其乞降聽處真實情由星夜具奏等因奉

聖旨這安南事情你每既這等議奏依擬行欽此欽

聖旨 遵備咨到臣又准兵部尚書毛急咨為軍務事

嘉靖十八年九月二十四日欽奉

勅諭叅贊軍務太子賓客兵部尚書兼都察院右都御史毛伯溫先該安南國黎寧奏稱國王黎暘故絕被賊臣莫登庸作亂竊據國城阻絕道路因而久廢職貢已經差官查勘是實方欲與師問罪節該兩廣雲南撫鎮等官奏稱莫登庸父子聞

天朝聲罪征討恐懼省悔上表乞降願以土地人民悉聽

天朝處分據其哀請似亦可矜

勅下廷臣會議僉謂夷情叵測詞雖卑懇意或詭秘故法不可不正義不可不彰今特命爾同總督軍務總兵官咸寧侯仇 前去兩廣雲南適中 去處會同彼處提督節制各該撫鎮并副叅以下三司等官將兩廣雲南應調漢土官兵及征討機宜悉照該部題

准事理聽爾便宜處置其賊臣父子如果悔罪請死束身待命將其乞降聽處真實情由星馳具奏若執迷不悛必誅不宥用兵之際爾等宜相機

酌處務要計出萬全期于僭亂底平罪人必得以彰天討以安遠夷斯副委任之重撫鎮三司等官拒違誤事者參奏處治其餘文武職官三品以下有不用命者聽爾即便拿問干係軍機不分文武官悉以軍法從事爾受茲重委其敬之慎之故勅欽此欽遵備咨前來除通行所屬一體欽遵外隨該總督軍務總兵官仇同參贊軍務兵部尚書毛起程前來會同臣與鎮守兩廣總兵官安遠侯柳巡按廣東監察御史洪巡按廣西監察御史何曾案通行

隨據兩廣三司查議兵糧等項事宜緣由各呈前來臣等會議已經具題該兵部覆題奉

聖旨安南事朝廷委託總督參贊文武二臣一切軍務悉以付之逆賊莫方瀛父子神明共殛卽生亦死但爲遐方生靈久被荼毒天討未加耳你部裏便行與仇鸞毛伯溫着悉心經畫務圖全功用安夷夏所奏畱及調用官員并動支解京錢糧等件吏戶二部卽日議奏來行今後安南軍情奏至各該衙門卽與題覆不許過三日該科記着查叅欽此欽遵備咨前來該臣就經會同鎮守兩廣

總兵官安遠侯柳 督調漢土官兵聽候征進
隨該總督叅贊衙門會委廣東按察司僉事林
希元前去福建漳泉等處雇募兵船又該臣等
行委兩廣左布政使楊銓等總理錢糧按察使
歐陽席查革姦弊叅政蕭晚等分理錢糧知府
等官朱鴻漸各整理一應軍需及買辦馬匹等
項按察司副使韓楷等督率通判等官周璞等
指揮等官張佐等各選募官領打手僉事莫同
雇撥夫船知事等官袁大本等各分理軍餉及
犒賞銀段等項千戶何倫等各管領馬匹軍器

等項叅議周延督率指揮劉纓等各押運糧餉
又該叅贊軍務尚書毛 會同總督軍務總兵
官咸寧侯仇 并臣議得莫登庸之罪固不能
逃但屢次具 表乞降未委虛的欽遵

勅諭事宜備云檄問案行兩廣雲南三司各該守巡
兵備副叅等官轉行安南長慶諒山府衛永安
文淵等州各父老省諭莫登庸莫方瀛知悉頃
者上 表乞降是否中心實情有無別項詐偽
如果真實何以表見其稱願以土地人民悉聽
天朝處分如果悉聽處分俱要逐一聲說務吐由中

實語勿事紙上虛文我

聖天子穆穆在上至聖至誠大小臣工明明在下惟

忠惟順

上下一德海宇同春可質諸鬼神豈但行於蠻貊戒

毋作偽徒取日拙之勞急宜自新早聽

天朝之命若支吾不實執迷不悛必大興問罪之師

弘宣弔民之意爾身就戮甘為獻馘之俘我伐

用張丕闡

天皇之列等因又為正名倡義昭大法以安夷方事

內開

天子為華夷之主必敦興滅繼絕之仁

聖人為綱常之宗必彰討叛除克之義時惟欽崇乎

天道所以允協乎輿情今黎氏之遺裔未泯而莫氏

之惡貫已盈天理人心昭昭不可掩也亂臣賊

子人人得而誅之爾安南雖僻在炎荒然素被

天朝聲教中間豈無抱忠仗義之士撥亂反正之才

必能共舉義兵以誅元惡茲當大懸賞格以速

成功照前備行長慶諒山等府衛永安文淵等

州省諭各父老士民知悉爾等各宜欽守

上天禍淫覆暴之心仰體我

皇上正名問罪之意思黎氏爲汝之舊王惡莫氏爲爾之世讐各宜奮勇據忠建謀設策一倡羣和不約而同近悅遠來不期而會大興討逆之義旅殲厥渠魁弘宣緝衆之天聲安其田里有能天降擒斬莫登庸莫方瀛父子者賞銀二萬兩仍奏聞朝廷大加陞秩有願以府州縣歸附者亦卽以其地與之并照前給賞夫如是則安南無辜之民得免殺戮之苦安南有志之士大彰忠義之名天道以順人心以安豈非安南之大幸哉不然則天兵四集之際難免玉石俱焚之患是時雖有忠義

之士無以自見亦將駢首就戮噬臍之悔殆無及矣汝父老士民其速圖之各去後隨據叅政翁萬達副使鄭宗古呈據委官指揮王良輔通判蘇廷瓚接到安南長慶諒山府衛申報夷目莫登庸投降表詞雖若卑懇但意尚詭秘必須提兵壓境宣布

朝廷威德庶使夷心懾服束身待命等因看得該道所呈誠爲有見當卽行取兩廣三司等官左布政使楊銓等俱前來會議整兵分爲三哨廣西馮祥州一路爲中哨監督官叅政

翁萬達統督官副總兵張經督率指揮王良輔
 等土官岑真寶等官領漢達土目軍兵共四萬
 名龍州羅回峒一路為左哨監督官副使鄭宗
 古統督官叅將李榮督率指揮周維新等土官
 岑芝等官領漢達土目軍兵共一萬四千名思
 明府思陵州一路為右哨監督官副使許路統
 督官都指揮白滋督率指揮賴傑等土官莫惟
 武等官領漢達土目軍兵共一萬四千名奇兵
 分為三哨歸順州一路為一哨監督官叅政張
 岳統督官都指揮張輓督率指揮張義等土官
 岑獻官領漢達土目軍兵共一萬四千名廣東
 欽州一路為山哨監督官副使陳嘉謀統督官
 叅將高誼督率指揮李邦相等土官黃賢栢官
 領漢達土目軍兵共一萬四千名烏山等處為
 海哨監督官副使徐捷統督官都指揮武鸞督
 率指揮余德等官領漢達土目軍兵打手共一
 萬四千名中軍營會委官都指揮董廷玉等官
 領漢達軍兵共五千一百二十七名通行各官
 遵照會差指揮王鎮等齎執

令旗令牌前去分督各哨又據監督官叅政翁萬達

呈稱督同委官指揮王良輔相度地勢將地名
長嶺播妙念涯坂陽加春羅吉等處分作六營
屬中哨肇平雷嶺對江楞爻布龍等處分作五
營屬左哨念遼豐門宦褒洞夏等處分作四營
屬右哨各闢除草萊創立排柵挑挖壕塹起蓋
營房修整太平直抵憑祥等處倉廩頓積糧餉
等事前來臣等即於本年九月十一日啓行親
詣南寧府調度兵糧相機行事據叅政翁萬達
呈稱莫登庸束身待罪會差指揮劉盛等齎執
令旗令牌前去受降隨據翁萬達等備呈前項受降

過緣由前來就經會行三司等官詳議去後今
據前因該總督軍務總兵官咸寧侯仇 叅贊
軍務太子少保兵部尚書兼都察院右都御史
毛 會同臣議照安南自五代以來丁氏黎氏
李氏陳氏皆據有其土負險爲固我

太祖高皇帝定天下之初陳日燿首先納款獲蒙
褒封其後寢以衰微爲賊臣黎季犛并爲所篡我
成祖文皇帝大興問罪之師俘季犛并其支黨以獻
求陳氏之後而不可得乃復郡縣其地未幾而
簡定季擴月湖黎利相繼叛亂而黎利尤爲首

逆中國調兵轉餉為之騷動者幾二十年我
宣宗章皇帝不忍以炎徼無用之地久煩中國故
示包荒俾獲內附而利敢忘

大恩紀元僭號其子若孫輒有二名黎龍偽名濬黎
濬偽名敬黎璿偽名誼黎濬偽名暘黎擠偽名
諛的名以事神祇偽名以事中國習相悖謬
致成亂階竟至微弱莫登庸以討陳高父子為
功漸積事權因而竊據我

皇上統天立極表正萬邦先年以登庸之罪義所當
誅然猶

命下廷臣議行查勘未遽加兵登庸父子悔罪革逆

亟遣頭目

表獻中國欽州之地願聽處分情詞甚恭
皇上明見萬里謂或中有詭秘未可盡信復

勅總督叅贊大臣親詣地方會同臣等從宜處置如
果束身待

命即便星馳奏聞臣等遵奉勅諭及

欽依事理整備兵糧奉揚

天討仍一面檄勅及懸賞格以勵彼國忠義之心嚴
紀律以作我師勇銳之氣分遣監督統督等官

各領漢達官軍士兵於兩廣沿邊地方連營壓境其雲南并湖廣福建軍馬亦行令整棚以待師期先聲丕震勢若雷霆莫登庸與其國人愈加洵懼乞降之誠恐終無以表見乃束身款塞懇稱衰老遣其親姪抱本待罪情願奉

正朔去僭號歸所侵四峒之地不敢踵黎氏謬習臣等察其情詞委果恭順遵照

欽依事理待以不死誓令回國恭聽處分備行三司副叅等官會議今既僉同似宜酌處竊惟自古南夷創亂類皆桀鷲狙詐憑恃險阻勢強則鴟

張以梗化力屈則鼠竄以全身中間亦有禮利害通款求附止於遣使奉表致其方物如尉佗黎桓者以漢文帝宋太宗之盛雖名為向服未有褫衣自縛懇求哀切如莫登庸今日者昔苗民逆命舜命徂征及其來格則從而分比之分比云者謂分別種類明立界限使之有所約束以遂其生盖不如是勢必復致爭亂而吾所以涵育化生之仁亦有所壅闕而不能全此帝王之待夷狄所以爲義之至而仁之盡也伏惟皇上德符堯舜功光

祖宗

神武之威藏於不殺。顯比之化溥於無私。是以

聲不振而醜酋震驚。一矢不遺而蠻邦

已收。有苗來格之功。寧可無虞。廷分比之化所

據。莫登庸并小日者。士人等乞要內附。稱藩歲

領。大統曆日補足。節年貢物等項。至等查得

安南自漢晉以後。雖稱內附。然夷獠之俗。瘴毒

之氣。終不宜於中國。大率數歲一亂。亂必連

結。黨類攻陷殺戮。又必數歲而後定。昔張輔以

十餘年勞費。僅得數處郡縣。叛者相繼。卒歸於

夷。此其明驗也。叅酌前世利害。莫若外而以

治夷。庶為穩便。如以莫登庸有罪。投降未宜輕

授爵土。伊孫莫福海。見今待

命。儻蒙

命儻蒙

矜宥。或可別與都護總管等項名色。如漢唐故事。每

年行廣西布政司頒給。大統曆日。令赴鎮南

關。祇領先年所缺貢儀。查照補足。以後年分。照

常舉行。其欽州。漸凜。古森。葛金。勒四峒。行令

原為安南事情。添註叅政副使等官。查照原額

編入欽州版籍。仍量優恤。三年以後。一體科差

其先後差來夷使事畢放回此正所謂以夷治
之者也但恐議者尚以黎氏爲疑臣等竊伏思
惟黎利倡亂阻兵陷沒郡縣殺敗官軍大將如
柳昇大臣如陳洽皆死於利之手其餘官吏戍
卒不能自拔者悉遭荼毒臣等至今言之尚爲
痛心我

宣祖特以生靈之故不欲窮兵而姑與之耳今莫登
庸之罪旣與黎利之犯夏者不同而一聞

天聲遂匍匐請死亦與黎利之屢抗

主師者又爲有間黎利旣蒙寬貸則登庸似應未減

至若黎寧雖自稱爲黎利子孫然臣節據諸司
查勘蹤跡委的難明鄭惟僚一向潛住該國上
下朗石林州峒寨附近廣西土官地方黎寧面
貌初不相識故或稱黎寧或稱黎憲或稱光照
或稱元和或又以爲阮塗之子或又以爲鄭氏
詐稱而近據雲南布政司開報會審夷人鄭垣
口詞稱漆馬江峒雖有黎寧而來歷宗派不可
得詳所列事情年貌又與鄭惟僚原報互異俱
難憑據臣等以爲今日之所處分係我

天朝安邊境馭遠夷之大策其操縱予奪不宜以通

賊之子孫而爲前卻但黎氏自修貢以來已蒙
列聖寬宥若其遺裔尚存似宜體恤合行雲南撫鎮
等官查勘果有可據別無異同聽令仍於漆馬
江居住見在所在地方俱屬管束或量與職事
徑屬雲南若非黎氏子孫置而勿論其鄭惟僚
卽於廣東所屬隨宜安插量給田宅不至失所
如此處分庶爲曲盡但事體關係重大臣等一
時之見未敢遽以爲然如蒙乞

勅該部會議上

請取自

聖裁使大疑以決大事以定華夷中外自是可晏外
無事矣臣等猥以菲才叨承

重寄夙夜圖念兵事進止頗審機宜昨因莫登庸來
降

宣諭

德意不但夷民懽欣鼓舞而我之三軍萬姓以至猺
矜僮款莫不同聲懽呼如和氣發動百物咸熙
實由我

皇上

聖武昭布

文德誕敷動之斯和不行而至蓋不待斬將擐旗之
功而自著威遠寧邇之績真可超越百王彰示
來世者也而勲輔大臣贊密勿之謨禮兵二部
集衆思之意

上下同德慮出萬全膚功之奏夫豈無自臣等亦惟
遙遵 廟算黽勉從事豈敢言勞除將莫登庸
抱本姪莫文明小目從人許三省等另差官管
押赴京開坐具

奏及將莫登庸自縛組一條發仰南寧府貯庫并
查劾勞大小官員另行分別具奏外謹題請

旨

安南投降小目解京 三十八

一嘉靖十九年十二月內提督兩廣軍務兵部左
侍郎無右副都御史蔡 題為遵奉

明旨以議處安南事據監督中哨廣西布政司添註
右叅政翁萬達等差委督備龍憑地方馴象衛
指揮王良輔管押安南投降夷目莫登庸原遣
抱本姪莫文明小目許三省等并莫登庸本一
函國人阮如桂等本一封呈送到 據此案查
先為

大慶事該臣行據廣西按察司添註副使翁萬達呈
送安南頭目莫方瀛原差齋捧首罪

表文小目阮文泰等前來會同兩廣三司左布政
使等官楊銓等譯審明白已經會行鎮守兩廣
總兵官安遠侯柳 等具

題外續該兵部會議題奉

欽依特遣文武大臣前來兩廣適中地方會同臣從
宜勘處今據具呈前來臣會同總督軍務總兵
官威寧侯仇 叅贊軍務太子少保兵部尚書
兼都察院右都御史毛 議照安南夷目莫

瀛先次具

表乞降已該臣等查議會 題并將差來小目阮
文泰等案行南寧府收發嚴密衙門居住聽候
處分今莫文明等復齋降本赴京阮文泰等事
同一起相應併行起送除莫登庸及國人投降
情由該總督叅替大臣遵照

勅諭事理會同臣先行星馳奏

聞外今差指揮王良輔等管押莫文明阮文泰等并
齋莫登庸阮如桂等原本赴京待

命爲此理合開坐謹題請

安南事竣 獻圖 三十九

一嘉靖十九年十二月內提督兩廣軍務兵部左

侍郎兼右副都御史蔡 題為祇

獻安南投降國本事伏惟我

皇上以安南國逆夷莫登庸遣使奉表納款或出一

時畏懼誅滅節詞求免未必本心特

命臣鸞臣伯溫會同臣經等率師往究其罪其軍前

一應征撫事宜聽臣等從宜相機處置臣等有

以仰見我

皇上正名討罪之威與包荒四赦之仁如

天地之化育春生秋殺過化存神蓋有並行而不悖

者臣等自受

命以來夙夜激勵將士整治行伍馳檄曉諭賊中俾

知順逆以為去就其於致果招携之義亦不可

偏廢以本年十月初四日進駐廣西南寧府地

方督發漢達土日官兵一十二萬五千一百二

十七員名鎮臨賊境下營分道深入邊寨莫登

庸自知罪重無所逃死節遣頭目人等匍匐來

營乞自縛請罪遣至親骨肉奉表入見削去踵

承先王黎氏所僭偽號謹歸黎氏原侵欽州四
峒地土願奉 正朔納貢臣等尚慮夷情多詐
反覆辯詰察其來意果出真實並無虛假遵照
勅諭事理備行兩廣都布按三司及副叅等官楊銓
祝續歐陽庶翁萬達蕭晚張岳鄭宗古陳嘉謀
許路陳茂義張經李榮顧邦重白泫張輓俱至
龍憑祥鎮南關內開張幕府高築將臺上設
龍亭覆以

黃幄前置 令旗令牌以本年十一月初三日許令
來降莫登壽皂帽白衣以練組自縛至

階下望 闕跪伏叩頭請死替禮生為之釋縛乃
行五拜三叩頭禮捧表授其親姪莫文明訖復
伏地請罪令之起乃敢起既而其國中耆人土
人及衆夷民次第俯伏陳狀皆數百繫頸行禮
如登庸布政等官楊銓等宣揚我
國家討罪大義與我

皇上所以矜憫夷方俯垂全活之意曉諭登庸及其
耆老夷民莫不感激踴躍俄頃之間懽聲震動
山谷臣等竊惟安南自五代以來不入 中國
版圖負其瘴癘險遠或服或叛中國常以不治

治之及至不得已興兵遠討雖至事勢窮蹙尚
乃冥頑弗率未有一聞王師之至即委國聽
命自縛乞哀如今日之卑順者非我
皇上至誠神武以不殺為威以萬全取勝何以至
此昔殷高宗伐鬼方三年克之周宣王平淮夷
近在要服之內當時文士猶作為殷武江漢等
詩播之金石奏之宗廟然後殷宗周宣之美煥
然後乎後世矧武王克商而天下歸心
皇上今駿烈邁跡殷周可無形容以示今傳後臣等
則待罪行問歌頌非職所及謹將出師受降次第

布為八圖曰

天威不振曰交夷組繫曰釋縛乞降曰稽首祈恩
曰夷使輸誠曰夷酋咸服曰耆士陳詞曰夷民
感德臣等非有尺寸之功所以彰明我

皇上至誠神武盪育羣生化及蠻貊捷於影響雖
大舜舞干羽七旬苗格之盛方之亦不是過實
為我國家千萬世無疆之休伏惟萬幾之
暇少賜披覽臣等不勝歡忭願望之至謹將

圖繪一冊隨本

上進伏候

勅旨

議處安南事寧陞賞 四十

一嘉靖二十年六月內兵部題該叅贊軍務兵部
尚書毛 題遵奉 明旨以議處安南事查得
先該本部等衙門會議具題奉

聖旨安南自昔本屬中國至宋授王封始淪於夷若
陳氏傳世久遠又知慕義納款爲我

太祖嘉獎者訓後人無伐其國帝王無外之仁何其
厚也止因賊臣黎季犛弑主日焜又殺其子孫添
平大逆不道上干我 文祖震怒始命將討平郡

縣其地是出交人於水火已不謂黎利復肆奸
鼓舞作叛又詭辭請封我

宣祖皇帝念息兵未久惟

聖祖爲陳氏意以恤交人始置不問累朝因之朕卽
位以來黎氏久不來廷將奉辭代罪節據勘奏乃
知有莫登庸竊據因其罪狀未明恐戮及無辜暫
差文武大臣從宜撫剿今登庸旣面縛軍門納土
請罪是與二黎兇悖有間察其降表與國人代陳
情有可原姑從赦宥茲爲交人永圖着革去王號
不許稱國庶免亂賊接迹相叛旣說黎氏無人登

庸久爲交土附屬准授以官職降賜印信奉正朔
朝貢仍許其地方與置官屬以便統轄其人民土
地朝廷無所利之一應事宜兵戶禮三部再會同
多官詳議來說來降一使着午門外叩頭賞資待
一併議奏押送官舍人等照報捷例行其餘依擬
欽此又該本部會議具奏奉

聖旨這事情你每再經會議安南國着改作安南都
統使司莫登庸授與做都統使賜從二品衙門銀
印仍與世襲其十三路地就照原舊地方各置宣
撫司設宣撫同知副使僉事各一員聽都統使管

轄差遣朝貢其合境大小官屬聽彼從宜建
屬人民前黎氏僭擬中國制度都着改正迴避廟
還四峒地方原係我邊氓收入版圖還行與兩廣
巡撫衙門好生優恤投降人等罪旣通赦了莫文
明准賞素紵絲衣一襲綵段二表裏阮文泰等綵
段一表裏許三省等紵絲一疋事完卽日遣回貢
議御前東宮照彼舊地方戶口錢糧不必冊奏其
餘依擬欽此已經通行欽遵去後今該前因臣等
議得安南僻在災荒亂階接踵寘頑負固聲教
難及自五代迄今乍叛乍臣載在往牒歷歷可

考洪武年間止以思明府侵地之故我

聖祖皇帝往復書諭竟未帖服 聖祖念其夷裔無

知置之不問永樂年間

成祖皇帝三犁其廷置之郡縣既而挾詐作逆詭辭

請封

宣宗皇帝不忍生靈塗炭曲賜優容至我

皇上登極則二十餘年貢使不至我

皇上赫然震怒大加征討 天兵甫臨莫登庸即不

勝震讐胤伏鎮南面縛請死且遣親姪莫文明

等赴京待罪跡其願率偽號願奉 正朔願

侵地之詞中懷悚慄惟欲免死豈敢求榮

皇上天地之量既授以官職復 降賜印信又且為

之處置官屬即今夷使業已遣還官兵盡皆休

罷不惟蠢爾蠻邦得以晏然無事雖東南數省

之民亦得相與息肩昇平之慶幸莫大焉仰惟

皇上以

神聖文武之資作華夏蠻貊之主仁經義緯德邁三

王 廟算

宸謀明見萬里故干羽之舞復見虞廷徂莒之過有

光周雅 神功 聖德有如 天地 臣等淺昧

過所揄揚况前項事體古今罕聞禮當布之華
夏播之金石使天下後世均知我

皇上威振遐荒之意合無 俯從臣等行移翰林院

撰文禮部具儀欽天監擇日百官上表稱賀

仍乞將降服始末移付史館采錄至于一時廷

臣如大學士夏 建大策仰裨休烈揚前受

命恭惟八告之猷海表稱藩感有一德之至功本殊

絕義當首論大學士翟 久居密勿而贊襄實

多仰承 德意而成功允賴翊國公郭 之建

白而指畫精祥禮部尚書嚴 之查覆而籌慮

周悉三臣眷寵之猷出自忠赤指授之策允中

機宜其功有不可泯者以上俱係輔弼勳部大

臣所有 聖心簡在總督軍務咸寧侯仇鸞茂

著驍雄聿昭忠悃指示發跡雖悉出於毛伯温

而開誠布公鸞亦同之提督兩廣軍務左侍郎

蔡 中懷忠盡力任勤勞處置得宜而兵糧雲

集撫輯有要而夷土風生雲南巡撫都御史汪

智慮精明施為卓犖身雖未歷於南寧事實

多由其經始以上四臣功在南土人所共知相

應論功定議伏望

皇上將毛 特加陞賞仍與 恩蔭以示優異仇鸞
蔡 同加陞賞汪 量加陞賞其叅政翁萬達
等四員巡按御史洪垣等九員黔國公沐朝輔
等三十三員太監馬廣等四十一員同知程鐸
等一百八員雖職有大小不同均為有功可錄
既該叅贊軍務尚書毛 具題前來劑量甄別
極其公當除將程鐸等一百八員各移文總督
巡撫官徑自犒賞外叅政翁萬達副使鄭宗古
知府江一桂指揮王良輔忠勤茂著太監馬廣
雖已取回總兵官柳珣雖偶值患病黔國公沐

朝輔雖未到地方委俱有先事圖維之勞臣等
謹查照原奏列為四等開坐 上陳伏候

聖明裁定至于臣瓚雖該毛 論臣有議處之勞緣
臣與臣繼祖臣以所先任本部左侍郎今致仕
陶諧俱待罪本兵仰仗

神謨獨運夷夏輯寧臣等免待罪愆亦惟多幸豈敢
言功再照仇鸞毛 原奉


簡命專為計處安南今投降夷目莫文明等既已遣
相二臣見在彼中無所事除仇鸞已今奉有
明旨外仍乞

聖明將毛 俯降 綸音早賜取回等因題奉

聖旨四夷不庭議當討罪自古中國帝王未嘗不用
此道昨安南廢職不廷本祭自朕心猶有畏縮譏
議阻搖國是者比命官勦剿平定今黎氏既已覆
滅莫曾繫頸來降朕心處分了何表賀之有內外
一應大小官員官勞宜錄大學士夏言首贊大策
功收不戰賞銀八十兩彩段六表裏翟鸞與存贊
勞賞銀五十兩彩段四表裏郭勛亦建有議賞銀
四十兩彩段三表裏嚴嵩不避集議賞銀五十兩
彩段四表裏毛伯温奉命任事馳檄發兵宣威炎

服南蠻振龍鬣卒見成功加太子太保蔡經陞都察
院右都御史兼兵部右侍郎照舊提督并仇鸞各
賞銀五十兩紵絲四表裏汪文盛賞銀五十兩紵
絲三表裏柳珣沐朝輔素著聲威克勤調度柳珣
加太子太傅沐朝輔加太子太保張瓚本兵力贊
各賞銀五十兩彩段五表裏樊繼祖賞銀五十兩
紵絲四表裏陶諧王以旂并馬廣各賞銀三十兩
紵絲二表裏翁萬達等四員各陞一級賞銀二十
兩紵絲二表裏洪垣等九員各陞一級賞銀二十
兩紵絲二表裏彭時濟等三十一員各賞銀二十

兩紵絲二表裏王德溢等四十員各賞銀五十兩
毛伯温寫勅取回京其餘依擬欽此



宗古

順南寧近... 吳... 太平... 太尉... 蔡... 鄧... 趙... 察

